

Melodi Natirel



*Ehn konpilasjion text lor lamizik ek lanvironnman
Par bann zelev KM Grad 4 – Iekol RCA*

KONKOUR LITERER 2017

SERVIS DIOSEZIN LEDIKASION KATOLIK

Dedikas...

*Pou premie zenerasion Zanfan - ek
ousi pou zot paron - kinna swazir
pou fer KM an 2012, malgre dout ek
linkon, e kinna tini ferm ziska 2017...*

Remersiman

Lindsey Collen : Pou formasion bann profeser KM lekol RCA ek donasian liv lor nom LPT.

Cindy Desalles : Pou koreksion bann text.

Christelle Geffroy : Pou koreksion bann text.

Suzelle Joseph : Pou travay grafik.

Brigitte Masson : Pou formasion bann profeser KM lekol RCA ek sipor pou bann pri konkour.

Alain Muneean : Pou formasion bann profeser KM lekol RCA ek donasian liv lor nom Abaim.

Marjorie Munien: Pou koreksion bann text.

Sant Nelson Mandela pou Kiltir Afrikin: Pou sipor konsernan bann pri konkour.

Bann zelev KM Grad 4 dan lekol RCA: Pou zot partisipasion dan konpozision bann text ek ousi pou bann ilistrasi.

Bann profeser KM lekol RCA (get lalis lor prosin paz) : Pou lakonpagnman ek sipor ki zot finn donn bann partisipan.

Bann manb personnel SeDEC : Pou diferan form led ki zot finn done.



© Servis dioezzin Ledikasion Katolik

Lari Célicourt Antelme

Rozil

Moris

Tou drwa rezerve pou tou pei.

Inprime par **Dragon Printing Co. Ltd.**

75, Rout-de-Pamlemous

Porlwi

ISBN 978-99949-0-387-0

Bann profeser kí'nn ankadre bann partisípan

	Nom		Lekol
1	Yoshita Louise	1	De la Salle RCA
2	Deesha Seeboruth		
3	Dorinne Grégoire	2	St François Xavier RCA
4	Anne Sophie Pyanee	3	Notre Dame de Bon Secours RCA
5	Gilbert Ducasse	4	Notre Dame De Lorette RCA
6	Anoushka Typhis	5	Notre Dame de la Paix RCA
7	Teelotna Deewoochund		
8	Vanessa Jeannot	6	Coeur Sacré de Jésus RCA
9	Anabelle Jean-Louis		
10	Stephanette Ducasse	7	
11	Sandrina Céline		Père Laval RCA
12	Stephanie Anthony		
13	Hansee Seetul	8	Signal Mountain RCA
14	Arielle Hungley		
15	Artee Bhoyrub	9	Camp de Masque RCA
16	Jennifer Bibi	10	Montagne Blanche RCA
17	Emmanuelle Dimba	11	Olivia RCA
18	Stephen Bourdon	12	Plaine St Cloud RCA
19	Isabelle Louise	13	St Léon RCA
20	Stephanie Sheik Hossen	14	Louis Dorbec RCA
21	Nicholas Cécile	15	St Julien RCA
22	Aurélie Caniah	16	Ste Thérèse RCA
23	Kirti Devi Seegoolam	17	
24	Koomaravallee Thondroyen		St Esprit RCA
25	Daurine Pacifique	18	Notre Dame Du Mont Carmel RCA
26	Purmah Rumeshwarsingh	19	Notre Dame du Grand Pouvoir RCA
27	Sébastien Soobramania	20	
28	Caroline Dorasamy		St François D'Assise RCA
29	Elodie Li Man Wah	21	
30	Valérie Telescourt		St Jean Bosco RCA
31	Mary Joyce Laguette-Antonio	22	St Patrice RCA
32	Jenny Nadal	23	Ste Cécile RCA
33	Christabelle Koonnee	24	Souillac RCA
34	Guessaven Munisamy	25	Philippe Rivalland RCA
35	Isabelle Noordine	26	Case Noyale RCA
36	Yomelah Anasamy	27	Jean Paul II RCA
37	Jennita Dindyal	28	
38	Brinda Harvey		St Paul RCA
39	Tony David	29	Notre Dame de Lourdes RCA
40	Clothilde Brelu-Brelu	30	
41	Honorine Emilie		St Benoit RCA
42	Jennifer Bonne	31	St Enfant Jésus RCA
43	Denis Jean	32	St Jacques RCA
44	Sandrine Nina-Sylva	33	Notre Dame des Victoires RCA

Prefas

Servis Diosezin Ledikasion Katolik (SeDEC) ena plezir prezant enn konpilasion bann tantativ lexpression kreatif literer dan langaz maternel par zelev Kreol Morisen (KM) Grad 4 ki pe aprann dan bann lekol RCA Moris. Sa bann text-la finn soumet a-lokazion enn konkour literer ki SeDEC inn organize lor tem lanatir ek/ouswa lamizik. Ala kifer nou'nn apel rekey-la 'Melodi naturel', enn ti klindey a lamizik ek lanatir.

Li normal ki nou koumans par felisit sa group environ 150 zanfan ki'nn partisipe, atraver 43 soumision. Nou egalman remersie bann profeser KM ki'nn ankadre bann partisipan depi 33 lekol. Li enn zafer formidab kan enn zanfan wit ou nef an kapav dir ki li'nn ekrir enn poem ouswa enn zistwar par limem. Se bann ti kiksoz koumsa ki kapav parfwa provok bann deklik dan potansiel kreatif enn zanfan. Lindsey Collen souvan rakonte kouma dan so lanfans, li ti abitie kree bann ti-zistwar ki li ti answit ekrir ar lame dan form bann ti-liv, e ki li ti sirkil ar bann manb so fami...

Piblikasion li donk enn zafer importan. Se dayer pou sa rezon-la ki dernie letap dan prosesis lekritir pou devlopman literesi se touzour piblikasion... Bizin partaz ar lezot, mem si li zis lor enn fey Bristol ouswa enn 'kitchen paper' ki'nn kole lor miray enn klas. Me se enn reflex ki nou pa touzour ena, malerezman. Liv ek kaye ena enn linportans telman sakre dan nou sistem skoler ki nou rarman depas sa bann letap-la. Ou alor, si nou fer li, nou expoz plito lekritir profeser. Ala kifer, nou dan SeDEC, finn desid pou pibliy sa bann text-la. Li vre ki zot kalite pa parfe ou ki parfwa nou trouv lanprint bann profeser dan bann travay-la (enn zafer toutafe normal anfet – bien tigit text literer pibliye san okenn retous par enn lot dimounn), me pou premie edision sa konkour-la, nou'nn anvi pourswiv sa prosesis kreasion la ziska lafin.

Anplis, 2017 se enn lane telman spesial, avek proze Kleopas dan ledikasion katolik, reform 'Nine-Year Schooling' ek premie group zelev KM ki pe konplet zot skolarite primer. Nou zisteman dedie sa rekey-la a premie zenerasion zelev – ek ousi zot paran – ki finn fer konfians langaz-la e ki finn tini ziska lafin. Zot finn donn enn formidab leson perseverans ! Kan enn premie zenerasion oze fer kiksoz, sa fasilit boukou zafer pou bann ki pe swiv par deryer. Rapel enn kout peryod 2011-2012... Se plis dan enn klima dout ki konfians ki KM ti introdir dan lekol. Inpe partou, li ti pli fasil tann bann rezon kifer fode pa swazir KM ki lekontrer. Erezman sa pe koumans sanze tigit-tigit, ziska zour kot kitfwa nou pou riye kan nou pou mazinn sa lepok-la !

Nou ousi atir latansion lor bann text ki dan sektion 'De-trwa lezot tantativ expresion kreatif an KM', ver lafin rekey-la. Li vre ki, konparativman, se bann text ki kapav paret inpe mwin abouti ki bann lezot soumision. Me anmentan, bann text-la inn gard enn kote inosan ek otantik ki permet nou koumadir fer enn ti vwayaz dan fason ki lespri bann zanfan fonksione... avan ki adilt sey rod met lord ladan ek striktir bann zafer. Bann text-la resamble inpe sa bann zimaz ki nou memwar rekonpoze kan nou reve... Pena bel lord, lozik ouswa koerans... Ena zis seki'nn pli frap nou dan enn fason dezordone. Seki'nn tas lor velkro nou memwar, kouma bann pedagog kontan dir !

Kot espere, sa ti piblikasion modes la va vinn enn mwayin siplemanter pou azout ankor plis velkro dan memwar pou valorizasion pouvwar kreatif literer bann zanfan atraver langaz maternel.

Pascal Nadal (organizater konkour ek responsab piblikasion)

Konteni

Sekcion	Nimero	Tit	Paz
Poezi lanatir	1	<i>Eleman lanatir an konfli</i>	8
	2	<i>Lanvironnman</i>	9
	3	<i>Sanzman pou nou lanvironnman</i>	10
	4	<i>Lanatir</i>	11
	5	<i>Pie dore</i>	12
	6	<i>Lamer enn danze</i>	13
	7	<i>Lanatir</i>	14
	8	<i>Papiyon Papiyon</i>	15
	9	<i>Ki bizin fer ?</i>	16
	10	<i>Lanatir an danze</i>	17
	11	<i>Anou al lekol dan lapli</i>	18
	12	<i>Lanvironnman</i>	19
Zistwar lanatir	13	<i>Zistwar Kokobanane</i>	21
	14	<i>Zistwar pie Zonas</i>	22
	15	<i>Bann gardien lamer</i>	23-24
	16	<i>Kouma korbo pou mal fini</i>	25-26
	17	<i>Vayana ek so fler mazik</i>	27
	18	<i>Zistwar Lamer Badamie</i>	28
	19	<i>Respekte nou lanvironnman</i>	29
	20	<i>Enn move rev</i>	30-31
	21	<i>Lanvironmann</i>	32
	22	<i>Lavi dan lakanpagn</i>	33
	23	<i>Bann Mervey Lanatir</i>	34
	24	<i>Lanatir</i>	35
	25	<i>Randone dan lafore</i>	36
	26	<i>Ti Dodo Feno ek bann avantirye</i>	37
Sketch lanatir	27	<i>Mesaz Later</i>	39
Poezi lamizik	28	<i>Puisans lamizik</i>	41
	29	<i>Lamizik</i>	42
	30	<i>Bote lamizik</i>	43
	31	<i>Enn kont de fe mizikal</i>	44
Zistwar lamizik	32	<i>Momo ek so ravann mazik</i>	46-47
	33	<i>Vwayaz ansante enn mazisien pou konkerir lamizik</i>	48-49
	34	<i>Rev Maeva finn realize</i>	50
	35	<i>Lavi Lontan</i>	51
	Sketch lamizik	36	<i>Lamizik kas tou baryer</i>
37		<i>Zistwar Ti-Frère</i>	55-56
De-trwa Lezot tantativ expresion kreatif an KM	38	<i>Zanfan lanatir</i>	58
	39	<i>Dora ek so liv mazik</i>	58
	40	<i>Robinn ek ti Martin</i>	59
	41	<i>Lamizik</i>	60
	42	<i>Zistwar Piter Pan</i>	61
	43	<i>Zistwar an dio</i>	62

SEKSION POEZI LANATIR





Eleman lanatir an konfli

Dife donn saler
Ki sort depi vant later
Kan li ankoler
Volkan exploze ar maler
Vomi bann lav destriksion
Ki les popilasion dan dezolasion

Delo baz lavi
Rezon lexitans
Ki nouri zom san okenn rekonesans
ENN linvitasion pou kadans lor to ledo ki
kraze lor rivaz
Alala ! To laraz pran twa
Kan to demare, personn pa kapav bare !
To revey nou konsians
Ki to donn lavi ek to repran li

Ler sinbol liberte
Sansasion fresser kan li soufle
Me kan li detourne
Divan devastasion kraz bann abitasion
Kit nou dan dezespwar
Ek plore ar frison lapert lespwar

Later mo patri
Berso mo lavi
To kouler transport mwa partou kot mo anvi
La kot bote mo pei emervey mo lespri
Tang, koson-maron pile lor to tapi ver
Ki amenn lazwa dan mo leker
Me kan to ouver to lavenn
Ranpli ar ranker
Sakenn get so sakenn
To debord mwa ar freyer.



Amy Omar, Noena Jean-Louis, Emanuel Apollon, Sophie Rougé,
Megane Mootoosamy, Kingsley Laboudeuse
(St Paul RCA)

L

Lanvironnman, lanvironnman, lanvironnman
Partou kote, dan kat kote
Kot nou gete, ena enn sel koze
Lanvironnman, lanvironnman, lanvironnman



a

Me lanvironnman se kot mo ete
Tou seki antoure
Depi lesiel ziska later
Depi later ziska lamer
Lanvironnman, lanvironnman, lanvironnman

v

Me lanvironnman se tou seki mo respire

Mo touse, mo manze, mo trape

Lanvironnman, lanvironnman, lanvironnman

n

Lanvironnman fer nou reve, divan so bote

Li fer nou mazine kouma pou progresse

Li inspir nou pou modernize

m

Me !

a

Lanvironnman pa enn poubel, ni enn depotwar
Kot zour apre zour nou pe trouv marenwar
ENN bozour li pou zis enn zistwar
Par nou manier gran-nwar
Se dir orevwar tou bann dezespwar
Lanvironnman, lanvironnman, lanvironnman

Lanvironnman pou reviv, si nou respekte lanatir
Lanvironnman pou respire si nou aret zete
Lanvironnman pou pli zoli si nou dir sori
Tou plastik bani pou moustik aret fer koustik
Lanvironnman pou enn paradi si tou lespri
Aret pans enn fason egois ek koumans reflesi
Lanvironnman, lanvironnman, lanvironnman... To pa zis enn nom !



*Lea Flore, Ahrisha Matombe, Guillaume Julie, Melanie Bagboot
(Louis Dorbec RCA)*


Sanzman pou nou lanvironnman

Nou planet ape vinn vie
Deplizanpli li an danze
Finn ler pou nou aret asize
 Bizin leve
 Bizin diboute
 Bizin netwaye
Pou sov seki reste

Ale-ale
Nou lemond ki pou resamble ?
 Toulezour nou refize
 Servi poubel pou zet salte
 Toulezour nou refize
 Ramas boutey ize
 Pou ki kapav resikle
 Kamarad, pa res ignore
 Kontign persevere
Pou ki nou lemond reisi vinn enn bote

Nou bizin solider
Travay ansam kouma bann frer
 Pou fer ki nou mama later
Vinn enn landrwa serye ek meyer
 Anou fer enn zefor
 Pou met polision deor
Nou ena devwar pou azir
Pou bann zenerasian fitir

Nou lanvironnman
Samem pli importan



Vanusha Moonsamy, Ezekel Ladouce

(Notre Dame de Bon Secours RCA)

Lanatir

1. Lanatir se enn
lamour interyer
Lanatir se enn kado ki
Bondie finn done
Dan nou leker
To lamizik rezone
Kan to brans pe
bouze to fey pe sante

2. Bann zwazo sante
telman zot kontan
to Bote
Telman to enn bote
Mo leker bate
E mo anvi anvole

3. Lanatir se enn
bote naturel
Kan mo mont lor
pasrel
Mo admir Samarel
Avek so kouler
larkansiel

5. Lanatir se enn
lanvironnman sin
Ki amenn nou lwin
Kot pa bizin
pran trin
Me ki nou bizin pran
swin

4. Kan soley
pe briye
Lanatir eklere
Letan li eklere
Mo lizie sintiye

6. Pou to res
enn bote
Bizin pa zet
salte



Ezechiel Boule
(St Jean Bosco RCA)



Pie dore

Ti ena enn pie dore ki ti iliminn lanatir
 De-zour-an-zour so lalimier ti pe reyone
 Partou ti pe eklere

Enn zour, enn dimounn inn koup sa pie dore la
 Lavi arete
 Lafore vinn nwar
 Bann zanimo pa ti pe sorti dan lafore
 Dimounn-la sagrin, regrete ek plore
 Li desid pou al rod enn lagrin pie dore


Malgre ti fer nwar
 Li ti gard lespwar pou trouv enn lagrin pie dore
 Enn zour li trouv enn lagrin eklere
 Li ramas li e plant li
 Li aroz li
 Pie dore grandi e li pouse

Pie dore iliminn lanatir
 Bann pie iliminn lanatir
 Fode pa koupe

*Méganne Mahadonday
 (St Jean Bosco RCA)*

Lamer enn danze

Enn zour papa ti al lapes lor enn pirog.
Kan li pe sorti, li remarke ki letan pe sanze.
Li persiste, li ale.
Letan vinn extra move.
Lamer ti desene.
Ariv enn moman, so lesans fini.
Papa remarke ki gal tro tipti.
Papa plonze, li trouv so bato pe ale.
Papa koumans per.
Lesiel finn sanz kouler.
Li gagn fre.
Li koumans esoufle.
Li finn tro naze.
Li nepli kapav plonze.
Li trouv resif nek dekale, elwagne.
Li kriye Bondie, pou vinn sap so lavi.
Si enn vag vini, papa so lavi fini.
Papa nwaye, so lekor ale...




Bhoomesh Pamoo
(Case Noyale RCA)

Lanatir



Soley leve, lesiel ble, zwazo zwaye
Lapli tonbe, niaz nwar, zwazo plote
Lamer monte, pwason laper, peser nwaye
Larivier deborde, lakaz pisinn, malere plore
Lafore brile, pie koupe, zanimo kriye
Lamer ankoler, vag monte, peser nwaye
Lakoler lanvironnman pe detrir
Laflam ravaz karo kann,
Lakoler lafore plore, Lakoler niaz kouler nwar, Lakoler volkan pe kriye
Latristes zanimo malad, leker fermal
Latristes enn pie koupe
Latristes enn fler fane
Latristes lamer sal, Latristes enn zwazo so lezel finn kase
Lafreyer lamer inn vinn poubel
Polision fer destrikzion, Polision detrir nasion
Konfizion se enn labirint san profonder delo
ENN zoli tifi enn bote lanatir
ENN zoli pie ver par deryer larivier yer
Soley leve, lesiel eklere, dimounn ere
Lazwa dan leker, soley briye, lesiel ble, zwazo sante
Lazwa dan leker enn zoli fler
Lazwa enn koray kolore
Lazwa amenn soley ek botan
Lazwa dan leker mama later
So zanfan so lizie finn ouver



*Jefferson Sardine,
Maeva Durhonne,
Tracy Camadoo
(Jean Paul II RCA)*

Papiyon Papiyon



Papiyon papiyon anvole anvole
Dan lesiel to pe ale
Kot to pe pase bann zoli fler to pou trouve
Ek labondans e labote to pou amene
Papiyon papiyon anvole anvole
Dan lesiel to pe ale
Kolorye lemond to pou reysi
Ek to ti lezel rouz ble zonn ver ek apwa
Papiyon ti papiyon liniver pou pli zoli
Larenn lanatir to pou vini
Papiyon papiyon anvole anvole
Dan lesiel to pe ale
Si to lezel kase, tou bann zoli kouler pou melanze
Lor tou fler to pou poze
Pou ki lazwa fleri
Papiyon papiyon anvole anvole
Dan lesiel to pou ale
Me to pou revini
Revini pou ki dan nou lakaz Kokon nou resanti

Maeva Gaud, Cassidy Benoit, Nayah Prosper,
Cherina Chiffonne, Christaelle Mariva
(Notre Dame du Mont Carmel RCA)

Ki bizin fer ? ? ?



Kot nou pase, ena salte
 Salte dan drwat, salte dan gos
 Salte devan, salte deryer
 Ayo ! Mo latet fatige
 Kan mo trouv salte partou-
 partou

Nou mama later ape soufer
 Lavi dan lamer ape vinn amer
 Zot pe toufe
 Zot pa pe kapav respire

Abe, ki bizin fer ?
 Ki bizin fer ?
 Ki bizin fer ?

Aret zet salte ! Aret polie !
 Tou seki nou zete pou retourne dan nou lasiet enn zour, dan nou lestoma.
 Be, ki pou arriv nou alor ? Ki pou arriv nou ?
 Nou pou malad ! Malad ! Malad !
 Nou lavi pou detrir

Ki bizin fer ?
 Ki bizin fer ?
 Ki bizin fer ?

Avan to zete, triye to bann salte

Pou ki kapav redwir, resikle ek reservi

Ansam nou kapav sov nou mama later



*Grace Bagboot, Nelan Kettary,
 Khrystal Rioux, Moïra Bonnefemme
 (Camp de Masque RCA)*



Lanatir an danze

Lanatir se enn mervey devan mo lizie parey kouma larkansiel.

Kan labriz soufle, sa fer mwa tranble.

Kan soley leve, mo lev ansam ar li.

Kan mo get sa ti peizaz-la, mo trouv enn lanatir ki finn pas boukou mizer.

Kan mo al kot larivier, mo trouv boukou dega ki bann dimounn pe fer.

Mo trouv loto ki pe touy boukou bann zanimo.

Kan mo get soley kouse, lalinn vini, lalimier alime.

Nou bizin fer leker dimounn eklere.

Anou les nou lanatir respire pou ki dime nou zanfan gagn lasans trouv so bote.

Respekte nou lanatir !



Cathy Desiré
(St Francois D'Assise RCA)

Anou al lekol dan lapli

Lapli tonbe toulezour.
Lapli tonbe sak semenn.
Lapli tonbe sak sezon.


Anou al lekol dan lapli.
Ki nou dan lete ou liver, lesiel plore.
Nepli kone si nou dan lete ou dan liver.

Ena zour pe bizin met palto.
Landemin soley pe briye.
Kouma nou pou fer ? Nepli kone.

Lapli tonbe toulezour,
Lapli tonbe sak semenn.
Lapli tonbe sak sezon.

Larivier deryer lekol pe deborde.
Nou tou pe bizin sove.
Nou pe gagn per tansion nou nwaye.

Nou pa pe anvi tranpe.
Nou pa pou kapav vinn lekol ankor.
Telman nou pe gagn fre.



Marie-Saule St Guillaume
(Case Noyale RCA)



Lanvironnman

Kot gete salte
Nepli kapav tolere
Nou bizin realize
Ki nou res dan enn sosiete

Nou pa kapav les li andomaze
Nou pa kapav les li polie
Nou bizin bouze
Nou bizin deside

Nou tou ansam
Ek nou laflam
Nou pou drese
Nou pou sanze

Lame dan lame
Nou pou arriv nou destine
Ramas tou kalite boutey
Ramas tou kalite fey

Koleksionn tou grander larou
Servi so bann trou
Pou dekore, pou plante
Pa zis sa, pou mem asize !

Ramas lapo pom
Avan li rant dan tom
Servi lapo banann
Ek tou lapo tann

Pou met dan nou konposter
Ki pou ranforsi nou later
Servi kouma fimie
Pou ed nou potaze ek verze

Nou pre a tou
Nou pre pou tou
Pou nou anbelir
Nou lanatir !

Met enn poze ek tou salte
Kontrol bann baz polie
Fer resiklaz
Afin ki nou trouv enn lekleraz

Tousala pe fer pou mo lekol
Pou li pa fini kouma enn vie bout tol
Bizin prezerv nou lanvironnman
Samem nou pli gran moniman

Polision pou deteryor nou lasante
Nou later nou pe mal zere
Alor pran konsians...
Pran konesans !


Gard lanvironnman prop
Parey kouma lakaz zot servi Misie Prop
Li pa difisil rapel
Ki bizin servi poubel !



Amy Omar, Noena Jean-Louis,
Emanuel Apollon, Sophie Rougé, Megane Mootoosamy, Kingsley Laboudeuse
(St Paul RCA)



SEKSIION ZISTWAR LANATIR



Zistwar Kokobanane

ENN ZOUR DAN ENN PEI, TI ENA ENN LAFORE KI TI APÉL TADOR. SA LAFORE-LA TI ENN PLAS EXTRAORDINER KOT TOU ZANIMO TI VIV DAN LAKORITE. PA TI ENA ENN ZOUR KOT LAFORE TADOR PA TI FLERI. DAN SA MEM LAFORE-LA, TI ENA ENN LARENN FLER KI TI PE PROTEZ TOU BANN KREATIR. OMILIE LAFORE-LA, TI ENA ENN GRAN PIE KI TI ENA PLIS KI SAN BANANE. PIE-LA TI BIEN OT EK TI BIEN ZOLI, PAREY KOUMA KAN ENN PIE BOUKE BANANE AN-FLER. BANN ZANIMO TI APÉL LI KOKOBANANE, PARSKI ZOT TI BIEN KONTAN LI.

KAN BANN ZANIMO MALAD, BANN-LA VENN OTOUR PIE-LA. KAN ZOT TI GAGN FIN, TOULETAN TI ENA KIKSOZ POU MANZE LABA. TOU BANN ZANIMO TI ERE, LAVI TI TRANKIL. KOKOBANANE TI KOUMADIR ENN BONDIE POU BANN ZABITAN LAFORE. TOULE SWAR ZOT TI RASANBLE OTOUR LI POU REMERSIE LI. BANN LISIOL TI VENN ILMINN PIE-LA POU KI BANN ZANIMO VENN ZWE LAMIZIK, SANTE EK DANSE.

MISIE KANKRELA MET SO KOSTIM MARON EK LI TRAP SO LAGITAR LI KOUMANS GRAT-GRATE. KONPER SIGAL SAKO尤 SO MARAKAS EK ENN TI SANPIE RANT DAN LANBIANS AVEK SO TI LAKORDEON. BANN ZWAZO DANSE EK LEZOT ZANIMO DAN LAFORE DONN KOUDME SANTE EK APLIDI. TOULETAN, TI ENA ENN BON LANBIANS OTOUR SA PIE-LA, KOUMADIR BANANE MEM. BIEN SOUVAN, LARENN FLER DIR BANN-LA : « MO BANN KAMARAD, ANOU RES TOUZOUR SOUDE, DAN NIMPORT KI SITIASION ! »

ENN SWAR, KAN TOU ZANIMO TI PE AMIZE, ZOT SANTI LATER TRANBLE ANBA ZOT LIPIE ; ZOT TANN ENN TAPAZ KOUMADIR LORAZ, ME PA TI LORAZ SA. FER NWAR ENN SEL KOUT ; BANN LISIOL AL KASIEL EK TOU ZANIMO KOUMANS GAGN SER-DE-POUL. ZOT TROUV ENN GRO LONBRAZ PE DEPAS NIAZ. ENN ZEAN TI PE ANVI RAS ZOT PIE, PARSKI LI PA TI APRESIE KI BANN-LA FER TAPAZ TOULE SWAR. ZEAN-LA DIR : « MO POU DERASINN ZOT PIE ; ZOT TRO KAS MO SOMEY TOULEZOUR. » AVEK SO GRO LAME, ZEAN-LA DERASINN KOKOBANANE. KOUMA LI FER SA, TOU BANN PIE EK FLER MOR. MEM LARIVIER SEK. LAFORE TI KOUMADIR ENN DEZER. TI PE FER EXTRA FRE. PANIKE, TOU BANN ZANIMO AL KASIEL.



APRE ENN SEMENN, PERSONN PA FINN GAGN MANZE, NI DELO POU BWAR. ZEAN KI TI FER SO GRAN-NWAR, TI AFAME LI OUSI. ENN SWAR, ALOR KI TOU DIMOUNN ZOT VANT TI VID, BANN ZANIMO LAFORE DESID POU RASANBLE MEM PLAS KOT KOKOBANANE TI ETE. ZOT MAZINN TOU BANN BON MOMAN KI ZOT TI PASE, EK ZOT TOU KOUMANS PLORE. ZEAN, KI TI PE ROD MANZE SA LERLA, FINN TROUVE KOUMA BANN ZANIMO-LA TI PE SOUFER PAR SO FOT. LI APROS AR BANN-LA, LI DEMANN ZOT PARDON EK LI KOUMANS PLORE LI OUSI. ZOT LARM TI PE KOULE KOUMA DILo DAN LARIVIER.

SEKI BANN KREATIR PA TI KONE, SE KI DAN FON LAFORE, TI ENA ENN TI LAGRIN KOKOBANANE. KOUMA SA LAGRIN-LA GAGN DELO, LI FINN ZERME EK ENN LOT KOKOBANANE FINN SORTI DEPI LATER, PAREY KOUMA SEKI TI LA AVAN. TOU KIKSOZ RETOURN A-LA-NORMAL : LAFORE REVIV, BANN PIE EK FLER POUSE, LARIVIER RE-RANPLI... ZEAN PROMET KI ZAME LI POU FER ENN KOLER PAREY ANKOR. DEPI SA SWAR-LA, TOU ZANIMO EK ZEAN OUSI REINI POU FER TAMTAM OTOUR PIE KOKOBANANE.

Zistwar pie Zonas

ENN ZOUR DAN ENN PEI, TI ENA 4 GARSON : Elysée, Loiyan, Eli-Jah ek Lensley, ki ti bann bon kamarad e ki ti touletan ansam. ENN ZOUR, ALOR KI ZOT PE SORTI LEKOL, ZOT DESID POU AL ZWE DAN ENN ZOLI ZARDIN. ZOT TI PE GALOUP PAR ISI, PAR LABA. ZOT TI PE ROUL DAN LERB. ZARDIN-LA TI TELMAN GRAN KI ZOT TI PE PERMET ZOT GALOUP PARTOU-PARTOU.

Ler zot pe zwe dan sa zardin-la, Eli-Jah trouv enn zoli pie bien fleri e miltikolor, ki ti pe diboute omilie, bien fier. Li dir ar lezot : « Ey ! Bann kamarad, get sa pie-la kouma zoli. Li ena gro-gro brans, long-long laliann ek bann gran fey. Nou kapav zwe Tarzan ! Anou kas bann fey pou nou fer nou linz, ek nou anpandan ar bann laliann-la pou sot lor bann brans. » Zot tou kriye : « Wi, sa enn bon lide ! »

Alor, zot koumans kas bann fey pou fer linz Tarzan. A sak fwa ki zot pe kas enn fey, zot remarke ki pie-la pe perdi so bann kouler ek so bann fler pe tom tousel. Eli-Jah dir so bann

kamarad : « Zot inn remarke ki pie-la pe vinn vilin ? » Loiyan reponn : « Wi vremem ! Bien bizarre sa... » Ala zot tann pie-la dir zot : « Aret kas mo bann fey. Zot pe fer mwa dimal. » Bann garson gagn per ek zot sezi enn sel kou. Elysée demande : « Kisann-la inn koze la ? » Pie reponn : « Mwa sa. Mo apel Zonas. Sak fwa ki zot pe kas mo fey, zot pa pe zis detrir mwa, me ousi lanta-tir. Gras a nou, bann pie, zot gagn loxizenn pou respire ; zot gagn fri pou zot manze ; zot gagn lonbraz pou zot pa griye dan soley. » Bann zanfan koumans pran konsians ki seki zot pe fer napa bon. Zot finn telman sagrin Zonas ki zot desid pou vinn get li toulezour ek aroz li pou ki li retrouv so bote.

Sak zour, se avek plezir ki zot aroz Zonas, koz-koz ar li, e dousman-dousman li koumans revinn zoli. Apre de semenn, Zonas inn revinn parey kouma bann garson ti trouv li premie fwa. Zonas finn vinn bien importan pou zot e li finn vinn zot bon kamarad. Sa kat garson-la ek Zonas finn vinn koumadir sink ledwa lame !

Depi sa zour-la, bann garson-la desid pou aret kas fey bann pie. Okontrer, kan zot dan lekol, zot sansibiliz zot bann kamarad pou ki zot gard lanvironnman bien prop e ki zot protez tou bann pie dan lakour lekol ek ousi kot zot reste.



*Elysee Colet, Eli-Jah Georgin, Jonas L'Eveille, Loiyan Murthen, Lensley Samoisy
(St Francois Xavier RCA)*

Bann gardien lamer

Enn zour dan enn fon lamer, ti ena enn mama ourit ki ti apel Oktavia. Li ti enn vre mama dife. Personn pa ti kontan li akoz li ti egois, mesanste ek parfwa mem impe volez. Toulezour, so gran lokipasion sete zis netway so bann dizef, ki ti anpandan dan so lagrot. Samem kiksoz ki ti pli presie pou li.

Enn gramatin boner, Oktavia desid pou al kokin bann koki ki li ti finn trouve lot zour-la, pou dekor so lagrot. Dousma-dousma, li glis-glise ek li vinn kouler disab.

Personn pa finn trouv li kokin bann koki. Bien kontan, li retourn so lakaz. Ler li ariv devan so lagrot, li gagn enn sok. Li trouv plin plastik ki finn blok so lantre.


Li tras-trase, li reysi rantre, me li trouv tou so bann dizef finn anvlope ar plastik. Li panike ; li rod tir bann plastik-la, me li pa resi. Enn lakoler pran Oktavia ; li koumans sanz kouler. Li kriye, « Ayo... Get ki'n ariv mo bann dizef ! Ki sann-la kapav finn fer sa ? Si mo gagn zot sa... Haya, zot pou kone ar mwa ! »

Dan sa ler-la, Kratos, enn gro krab, ti pe pase. Li trouv Oktavia pe marmote ek pe sanz-sanz kouler. Kratos dir dan so leker, « Hmm ! Aster mo finn kone kisann-la ki abitie kokin koki mo bann kouzin ! Bien bon pou li. Li ava sese ! »

E li kontign so larout. Oktavia finn dezespere. Li ti ankor pe lite pou tir bann plastik kan li trouv Kratos pase. Zantiman, li dir, « Ahhh ! Ou sa Misie Kratos ! Donn mwa enn koudme pou tir sa bann plastik-la do ! » Kratos gagn sok ; li ankoler ek li reponn, « Kisisa ? Donn twa enn koudme ? Abe, to ena toupe twa ! To fer gran-nwar ek tou dimounn... To kokin koki... Aster to pe rod led ar mwa ? Bien sagrin, pa kont lor mwa ! »

Pandan ki Oktavia ek Kratos ti pe diskite, Donna, enn ti dofin, ti pe pase. Li demande, « Ki pe arive-la ? Depi laba pe tann zot ! » Kratos explik Donna ki finn arive. Donna reflesi ek dir li, « Kalme twa Kratos ! Olie fer koler, anou rod enn solision ansam pou nou ed Oktavia. » Kratos pa ti pe tro dakor, me li res trankil. Donna vire ek li dir Oktavia, « To trouve, kan to ena move manier, personn pa rod ed twa kan to dan problem. To bizin sanze ! » Oktavia bes so latet ; li gagn onte. Li pa dir nanye ek li reflesi. Apre enn timama, li dir, « Mo dakor ki mo finn mal azir anver zot. Mo finn pans zis mo tousel. Get aster mo pe bizin zot koudme. »

« Li bon ki to finn rekonet to erer. Zame tro tar pou sanze. » Donna dir. Kratos, ki ti dan enn kwin, reponn, « Mo aksepte to exkiz, Oktavia. Nou tou nou ena mem problem. Ena boukou kiksoz ki pe detrir nou lakaz. Li pe vinn deplizanpli difisil pou nou viv. Bann salte ek prodwi simik ki bann imin zet dan lamer pe anvair nou lanvironnman.







» Donna azoute, « Mo panse nou tou bizin met lame dan lapat pou nou lit kont sa bann problem polision la, parski ena bann kamarad ki finn fini disparet akoz tousala. »

Donna propoze ki zot al rod bann vwazin pou vinn ed Oktavia. Torti, Lare, Zetwal-de-mer, Laf, Omar ek lezot mobilize pou vinn tir bann plastik ki finn bous lakaz Oktavia ek touf so bann dizef. Anmemtan, Oktavia gagn enn lide e li dir, « Kifer nou pa kre enn group ki pou travay ansam pou netway nou landrwa ? Nou kapav zwenn de fwa par semenn pou nou rod bann solision, sirtou pou ki nou bann zanfan kapav viv dan enn lanvironnman pli prop. » Zetwal-de-mer kriye, « Weee ! Bon lide sa ! Nou kapav apel group-la 'Bann gardien lamer' ! Ki zot dir ? »

Zot tou dakor ek bann gardien lamer koumans met serye pou netway lakaz Oktavia. Vit-vit, lagrot revinn prop parski zot tou finn travay ansam. Leker kontan, tou bann zanimo organiz enn ti fet pou selebre zot nouvo lamitie.

*Solena Furcy, Annaelle Regle, Gaelle Sophie,
Jadiel Leung Hon Tsang, Bradley Grenade
(Père Laval RCA)*



Kouma korbo pou mal fini

Korbo, avek so plim nwar glase ek so labek nwar, enn zoli zwazo. Me personn pa kontan li parski li manz tipti zwazo. Dimounn dir ki korbo port maler. Me li plis enn nwizans parski li fer boukou tapaz ek li fer malpropte partou. Koko se enn zenn korbo ki pe fer lexperyans lavi. Li anvol partou-partou ziska li ariv kot enn larivier. Li trouv zoli-zoli pwason pe naze dan bor. Li poz lor enn ros pre ar bann pwason-la. Li demann zot « Ki pe deroule ? » Bann-la dir li lavi pa serye dan larivier. Ena plas delo kouler ver parski lizinn zet zot delo ize dan larivier. Ena plas to kapav dormi lor lili oubien dan sofa, ena mem frizider, masinn-a-lave, vie karotsou... Ziska vie loto ek kamion ena dan larivier ! Koko avole li swiv larivier ziska li ariv kot larivier zwenn ek lamer. Koko zwenn enn bann lezot zwazo ; li koste e li dimann zot « Ki pe deroule ? » Bann-la dir li « Ayo ! Ki nou pou dir twa korbo ? Lavi ti trankil isi ziska ki manze inn vinn rar. »

Koko : « Kifer manze inn vinn rar ? » Bann-la reponn : « Tro boukou polision... To pa santi sa loder mazout la ? »

Koko : « Mo pe dir enn drol loder, me mo pa ti kone si mazout sa ! » Bann-la : « Dimounn vinn lav zot veikil dan bor larivier ; lerla, tou sa delo malang la vinn isi. »


Koko : « Pa bon ditou ! » Bann-la : « Wi ! To ena sans to finn trouv nou la ! Nou finn deside pou al rod enn lot baz pou gagn manze. Lot kout to pas la, nou pa pou la ; nou pou plis ver lenor. »

Koko kontign so larout ver Lesid. Li trouv enn zoli laplaz disab blan. Li desid pou poz enn kou. Kouma li poze, enn ti krab koste kot li. Me Mama krab la vini for-for ek li kriye : « Eta ti ninport, pa koste kot korbo tansion li manz twa. »

Koko dir : « Non, mo pa move mwa. Mo pa manz personn. » Mama krab : « To ankor zenn. Plitar pou bizin per twa ! Ki to pe fer la ? »

Koko reponn : « Mo pe bat enn kare pou dekouver lemond. » Mama krab : « Avek to ti lezel-la, to pou zis kapav dekouver Moris. To pa pou kapav fer letour lemond ! »


Koko : « Zis ek seki mo'nn trouve ziska ler, mo'nn fini plin. Kot mo pase dimounn pe plengne. Zot tou nek pe koz polision apart twa ! » Mama krab : « Polision ! Polision partou ! Get otour twa. Kann labier, tou sort kalite boutey... seki plastik tou, sak plastik. Get kouma lisien pe fer festin anba pie ! Samem poubel bann pikniker. Pou zot, sak pie se enn poubel ! Si bizin dir mem, polision pli danzere pou mo ti-baba ki korbo. »



ENN GRO LASOUFRANS PRAN KOKO. LI DIR MAMA KRAB : « PRAN TO PITI MONT LOR MO LEDO MO AMENN TWAENN BAZ SERYE KOT TO TI-BABA KAPAV GRANDI BIEN. »

Mama krab ek so piti mont lor ledo Koko ek Koko anvole. Zot sot lagon zot trouv dofin ek labalenn pe sote dan delo... Zot kontan ! Pa pou lontan ! Inpe devan, zot trouv enn dofin ki finn may dan enn vie file. Li pa pe kapav sape. Zot desann ; Koko servi so labek ; Mama krab servi so pins ek zot reysi sap dofin-la. Zot repran zot larout zot al plis ver lesid. Zot trouv torti pe naze. Mari zoli ! Ala enn torti inn rant latet dan enn sak plastik. Ankor enn kou, Koko desann ek li sap torti-la. Zot kontigne zot larout, me san li realize, Koko finn al tro lwin. Letan zot desid pou retourne, Koko tro feb pou revinn lor la-kot... Li tom dan delo li mor... Mama krab ek so piti kraz enn ti larm ! Zot mars-marse dan fon lamer ziska lakot.

Kacey Malherbe, Shelby Lebrasse, Jahmel Quirin,
Sevrine Clair, Siona Ramdanee
(Notre Dame de Lorette RCA)





Vayana ek so fler mazik

ENN DIMANS, VAYANA EK TOU SO LAFAMI PE AL LAMER FLIC EN FLAC. ENA ZOLI SOLEY EK ZOT TOU BIEN EXSITE. LAZOURNE PE PAS BIEN. BANN ZANFAN PE NAZE, BANN GRAN DIMOUNN PE KOZ-KOZE. VER ENN-ER, PAPA VAYANA INVIT ZOT TOU POU AL FER ENN LETOUR LOR BAT. ZOT TOU MONT LOR BAT, ZOT ALE. LER BAT-LA PE ALE DOUSMAN-DOUSMAN LOR LAMER, VAYANA TROUV ENN TI-LIL. LI PROPOZ SO PAPA POU AL FER ENN LETOUR LABA. SO PAPA AKSEpte.

BATO KOSTE, ZOT TOU DESANN. MAMA VAYANA PREFER RES LOR LAPLAZ. VAYANA, SO PAPA EK SO FRER ANAN AL MARS-MARSE. LETAN ANAN PE RAMAS BANN KOKIYAZ, VAYANA PE ADMIR BANN ZOLI FLER KI TI ENA PARTOU-PARTOU. APRE KINZ MINIT, PAPA VAYANA DEMANN ZOT TOU RETOURN LOR BAT. VAYANA DEGAZE KAS ENN ZOLI FLER ROZ KI ENA TRWA PETAL, LI GALOUPE, LI ALE. BATO REVINN KIT ZOT LOR LAPLAZ FLIC EN FLAC.

TANTO, VAYANA EK SO FAMI RETOURN LAKAZ. KOUMA LI RANTRE, VAYANA MET SO FLER DAN ENN VAZ EK LI PRAN VAZ-LA, LI MET LI DAN SO LASAM POU KI PERSONN PA TOUSE.

Toule swar, avan li al dormi, Vayana abitie fer so lapriyer. Li ti enn tifi bien zanti e ki ti kontan propte. Dan so lapriyer, Vayana demande ki so fami ek so bann kamarad aret zet salte partou-partou. Li tris kan li trouv sa. Sa zour-la, letan li pe priye, Vayana trouv so fler pe briye. Li koste, li gete, li trouv bann petal-la ranpli avek bann lapousier dore. Li gagn sok ! So lizie res fixe lor lamem. Ler fler-la revinn normal, Vayana fer enn sourir, li kares bann petal-la, li terminn so lapriyer. Apre, li tengn lalimier, li al dormi.




Landemin gramatin, Vayana leve, li pare pou al lekol. Ler li rant dan lakwizinn, li trouv so frer Anan pe ramas dezord ki li'nn fer lor 1 atab ek apre li al lav so tas. Li soke ! Pa so labitud sa ! Li felisit li. Apre zot al lekol ansam.

Dan lekol, mem roulman : met anran, rant dan klas, fer devwar, manze, bwar, zwe midi... Me sa zour-la ti bien spesial... Tou bann zelev ti pe zet zot salte dan poubel. Klas ek lakour lekol ti res prop. Metdekol finn desid pou fer plant bann fler partou-partou dan lakour. Vayana extra kontan.

Ler li rant lakaz, li rakont sa so mama. So mama dir li : « ENN MIRAK SA, MO TIFI ! » ASWAR, VAYANA FER SO LAPRIYER ANKOR. KOUMA LI KOMANSE, SO FLER REKOUMANS BRIYE. VAYANA GET LI BIEN APRE LI KAS ENN GRAN RIYE. LI'NN AL KONPRAN KI SO FLER MAZIK E KI SEKI LI'NN DEMANDE DAN SO LAPRIYER FINN EXOSE ! DEPI SA ZOUR-LA, LI PRAN LI BIEN KONT ; LI KOZ AR LI, KARES SO BANN PETAL E REMERSIE LI TOULEZOUR AVAN LI AL DORMI. SA SE SO SEKRE !

**Lorena René, Shenzi Vieillesse, Typhaine St Cyr, Noémie Chery, Sheryl Chieffar
(St Enfant Jesus RCA)**




Zistwar Lamer Badamie

Enn zour dan enn pei, ti ena enn lamer ki ti apel Lamer Badamie. Li ti extra zoli. Laba, lesiel ti bien ble ek soley ti briye dan lesiel. Tou dimounn ti bien kontan al sa lamer-la, sirtou pou kanpe. Enn zour, boukou dimounn finn vinn kanpe. Zot ti mem amenn zot bann zanfan. Bann zanfan-la ti pe manz gato. Letan zot fini manze, zot zet zot plastik gato dan lamer. Lamer ti vinn bien sal.

Lamer koumans plengne avek lesiel, niaz ek soley. Li dir : « Gete ki zot pe fer mwa ! Avan zot vini mo ti bien prop. Zot pe sali mwa net. » Bann-la get li, zot sagrin. Lesiel reponn : « Mo pou ed twa. Mo pou fer lapli tonbe. Lerla, tou dimounn pou ale. » Lesiel vinn gri, soley al kasiet deryer niaz ek niaz koumans plore... Letan bann dimounn trouv lapli, zot degaze ramas tou zot bann zafer, zot ale.

Letan soley revini, tou dimounn retourne. Lamer koz avek zot e li dir : « Silvouple, pa zet salte ankor. Zot pou touy tou mo bann konpagnon zanimo ek zot pou sali mwa. Personn pa pou kapav naze si zot sali mwa. » Lesiel dir : « Kifer zot pe fer sa ar mo kamarad ? Si zot pa respekte li, mo pou revinn gri. » Soley dir : « Si zot pa ekoute, mo pou al kasiet deryer bann niaz. » Niaz dir : « Si zot fer move avek mo kamarad, mo pou plore. »

Tou dimounn konpran ek zot demann pardon. Zot koumans ramas tou bann salte lor laplaz. Ena dimounn ki mem plonze pou al tir bann salte dan fon lamer. Depi sa zour-la, personn pa sali lamer ek fer tou pou gard li prop.



Queenaelle Dorasamy, Kyanna Louise, Alexia Latulippe, Naddy Errayya
(Souillac RCA)



Respekte nou lanvironnman

Enn zour ti ena kat kamarad ki ti apel Toni, Rama, Sami ek Rolo. Zot ti pe asize anba pie mang pandan rekreation, e zot ti pe manz zot gato ek bwar zot zi. Ler laklos sone, zot degaze leve, souy zot labous ek zet zot bann papie gato anba avan zot ale.



Ler Rolo trouv sa aksion-la, li dir so bann kamarad : « Ey ! Zot ale ? Zot pa zet zot salte dan poubel ? » Bann-la pa pran kont, koumadir pa zot problem sa. Zot kontign ale san ramas zot salte. Rolo pa ti dakor avek seki so trwa kamarad ti'nn fek fer, e li desid pou ramas bann salte-la limem.

Antretan, so trwa kamarad fini rant dan klas Kreol Morisien, kot zot mis ti pe atann zot. Pandan ki mis Jenny pe koumans so klas lor topik lanvironnman, Rolo fer so lantre. Mis Jenny ti inpe agase par so retar, san kone ki Rolo ti pe fer dan lakour.

Bann kestion lor lanvironnman ti pe deroule dan klas, e mis Jenny poz Rolo enn kestion lor seki li panse lor polision. Rolo ti pe paret bien tris. Li bes so latet ek so larm koule dan so lizie. Tou dimounn dan klas finn trakase par so reaksion.

Ler Mis Jenny demann li kifer li tris, li dir ki delo finn rant dan so lakaz avek gro lapli ki finn tonbe dernieman. Se avek enn gran lapenn ki Rolo finn rakonte kouma delo finn mouy tou so bann zafer lekol, so linz ek mem so bann komision finn al dan delo. So lafami ek li finn bizin al dormi kot enn vwazin ek zot finn res san manze. Lerla, li dir ki se bann salte ki dimounn zete partou ki finn bous bann drin ek larivier. Apre, delo finn monte ek koz inondasion.



Ler so bann kamarad finn tann sa, zot finn realiz zot erer. Zot finn konpran ki kan zet salte partou, sa kapav fer bokou ditor lanatir ek ousi bann dimounn otour zot. Apre sa, Rolo so trwa kamarad finn vinn ver li pou demann li exkiz pou ditor ki zot finn fer san realize. Depi sa zour-la, bann zelev finn konpran ki tou dimounn bizin pran zot responsabilite, e ki pa bizin zet salte partou-partou pou protez lanvironnman.

Alafin, Mis Jenny ti bien fier so bann zelev. Li pa finn bizin explik bokou kiksoz lor topik lanvironnman, me so bann zelev finn fini konpran bann aksion ki bizin pran pou enn lanvironnman sin.

Enn move rev



Tatiana se enn tifi ki kontan zet salte partou-partou. Li pena okenn respe pou lanatir. Enn zour, apre rekreation, alor ki Tatiana pe rant dan so klas, so kamarad Amelia vinn ver li ek dir: « Tatiana ! Mo ti pe rod twa pandan rekreation. To le sa gato-la ? Mo pa kontan manz sa. »

Tatiana : « Wi ! Mwa mo kontan sa ! Mersi ! »

Tatiana manz gato-la deswit ek li zet plastik-la anba.

Amelia : « Ey ! To pa kav zet sa dan poubel ? To pe polie nou klas. »

Tatiana : « Be, pena dimounn pou netway klas-la ? Si mo zet tou dan poubel, bann ‘caretakers’ pa pou ena travay ! »

Samuel : « Bonn apremidi zot tou. Degaze al asiz dan zot plas. Tatiana ! Fek koz lor lanvironnman sa semenn-la. Get dan to pipit enn kou... Ranpli ar lapousier kreyon... »

Tatiana pas so lazourne normal kouma toulezour. Li kontign so bann move labitud zet salte partou. Lor sime retour, tout long larout, Tatiana donn koutpie dan bann plant ki li trouve.

Aurelien : Get kouma to pe kas tou sa bann plant-la Tatiana !



Tatiana : « Ki to pe gagn zot traka ! To trouv zot pe gagn dimal ?

Aurelien : « Be wi ! Zot vivan sa bann plant-la... »

Malgre sa, Tatiana kontinie ziska li ariv kot li. Tatiana rant kot li e pas lasware avek so lafami. Kan ariv ler pou al dormi, li mont lor so lili san okenn remor pou tou seki li finn fer pandan lazourne.

Lelandemin, Tatiana pe marse pou al lekol ek so dipin dan so lame. Li manz ankor de bouse e li desid pou zet leres. Malgre ki ena enn poubel zis devan li, so mesanste dan li, li zet dipin-la andeor poubel-la. San ki li atann, poubel-la nek leve e koz ar li :

Etwala ! To pa onte ? Ki sa ti pou kout twa si to ti lev mo kouvertir e zet dipin-la ladan ?

Tatiana gagn enn sok : « Depi kan poubel ti koze sa ? »

Poubel : « To pe tro ale ! To pas to letan zet salte partou. Ki to krwar, mo la zis pou fer dekorasion ? »

Tatiana koumans gagn per, ek avek enn lavwa tranble, li reponn : « Be... si mo zet salte dan poubel, mo pou sali poubel-la ! »

Poubel nek kriye : « To bizin servi mwa ! »

Tatiana kriye ek poubel koumans galoup deryer li. Amezir ki li pe galoupe, Tatiana trouv salte partou ; plant ek zanimo inn mor partou... Enn plant ki ti pe bouze e plengne, trap li e dir li : « Tousala akoz twa ! To'nn gat partou ! Tou pe mor ! » Pli devan, li trouv so papa ek so mama pe alonze anba :

« Mo tifi, ler telman ranpli ar polision ki nou nepli kapav siporte. Nou nepli ena nanye pou manze. Tou pe mor parski to finn pas to letan ar polie. »

Tatiana kriye e tap avek enn kolonn. Ler li ouver so lizie, li retrouv li lor so lili kouver ar transpirasion ! Ouf ! Tousala ti zis enn kosmar. So papa rant dan so lasam : « Ki to gagne ? Kifer to ti pe kriye koumsa ? »

Tatiana : « Pa ! Mo ti krwar zot inn mor ! »

Li rakont so kosmar so papa.

Papa : « Mo tifi, mo bien krwar ki lavi pe rod lans twa enn mesaz. »

Sa zour-la, dan lekol, Amelia etone ler li trouv Tatiana zet enn plastik gato dan poubel. Tatiana explik li ki finn koz sa sanzman-la. Amelia profite pou fer enn ti moral avek Tatiana : « To kone Tatiana, erezman to finn sanze. Si zordi nou pe sibir resofman klimatik se parski boukou dimounn azir kouma twa to ti pe fer. Si nou kontan nou lemond, nou bizin fer tou pou protez li. Mem lekol finn desid pou met trwa poubel dan sak klas pou triy bann salte.

Tatiana Précieux, Haurelien Jean, Amelia Veerapen, Samuel Pitois, Lucas Numa

(Notre Dame des Victoires RCA)





LanVironmann

ENN ZOUR DAN OLIVIA, TI ENA ENN TI GARSON KI TI APÉL ETHAN. LI TI PE MARSE PRE KOT ENN TI DANBWA AKOT TI ENA ENN LARIVIER. LI TI ENA ENN BOUTEY DELO DAN SO LAME. ETHAN TI PE ADMIR TOU SEKI LI TI PE TROUVE : MONTAGN LE CHAT ET LA SOURIS, EK BANN KARO KANN. LI TI PE SANT-SANTE.


« Sov mwa ! » LI TANN ENN TI LAVWA PERSAN PE IRLE. ETHAN KOUMANS GAGN PER. ENN SEL LIDE VINN DAN SO LATET : SOV SA DIMOUNN-LA. PANIKE, LI GET GOS-DRWAT, LI PIK VER LARIVIER EK FANN SO LIZIE PARTOU. ME LI PA TROUV PERSONN. PLI LI AVANSE, PLI LAVWA-LA BESÉ. BANN TI LASWER TI PE BRIYE LOR SO FRON.

HEP ! LI TROUV ENN TI PWASON ROUZ PE VALSE DOUSMAN-DOUSMAN DAN DELO, KOUMADIR LI PENA KOURAZ. ETHAN KOSTE, SO LEKER PE BAT VIT-VIT. « AYO ! ALA SANTI PI LA ! » ENN MOVE LODER FOR FATIG SO NENE. ME LI PA REKILE. LI ANVI SOV TI PWASON-LA.

LI ZET ENN KOUDÉY OTOUR LI. LATRISTES PRAN TOU PLAS DAN SO LEKER. SO LARM ROULE PARSKI LARIVIER-LA BIEN SAL. LI SAGRIN SA TI PWASON-LA. ETHAN REMARK BANN VIE OBZE PE FLOTE, ENN MONTAGN MANZE GATE PE DEBOUTE DAN BOR LARIVIER EK ENN LISIEN MOR APE ALE DAN DELO. TOUSALA VIR SO LESTOMA. LI REPRAN SO KOURAZ EK LI KOSTE AR PWASON-LA.

ETHAN DEMANN LI : « KIFER TO PE KRIYE ? » AVEK BOUKOU ZEFOR, LI REPONN : « MO PE MOR ! BANN GRAN ZOM FINN LAPES MO BANN PARAN. ENN GROUP ZENES TI VINN KAS ENN POZ EK FINN LES TOU ZOT SALTE ISI, KOUMADIR ENA ENN POUBEL LA. PERSONN PA RESPEKTE MO LAKAZ. MO MANZ TOU SEKI ZOT ZETE : MANZE GATE PE FER KOUSTIK DAN MO VANT, VIE SAK PLASTIK APE DANSE DAN MO TRIP. MO PA PE KAPAV RESPIRE... »

ETHAN DEGAZE TIR PWASON-LA DAN LARIVIER EK MET LI DAN SO BOUTEY DELO. LI GALOUPE, LI AL KRIY SO BANN KAMARAD POU NETWAY SA PLAS-LA. APRE BOUKOU ZEFOR, ZOT REISI REDONN SA LARIVIER-LA SO BOTE. ENN PARFIN FRE KOUMANS FANE ; BANN PIE DEBOUT BIEN OT EK FIER, EK BANN ZANIMO MARIN TI ENA LAZWA-DE-VIV. TOU BANN ABITAN TI PROFITE POU AL REPOZE AN FAMI LABA. DEPI SA ZOUR-LA, ETHAN EK TI PWASON FINN VINN DE BON KAMARAD EK A SAK FWA KI ZOT TI ZWENN, TI PWASON TI SANT ENN SANTE POU LI.



Florian Raymond, Kelian Brasse, Kendra Huteau,
Elijah Jude, Noah Marie (Olivia RCA)



Lavi dan lakanpagn

Enn zour dan enn pei, ti ena enn tifi ek so granmer ki ti pe res dan enn laferm. Tifi-la ti apel Lucy ek so granmer ti apel Melanie. Zot ti pe nouri bann zanimo kouma poul dan baskour ek kanar kot lamar. Ti ena ousi vas, kabri, sat, lisien ek kok. Zot ti ousi plant legim dan enn gran lespas.


Kot zot ti reste ti bien pezib. Zot ti res anba lipie Montagn Le Pouce. Ti ena bokou zARB otour zot lakaz. Ti ena ousi plantasion kann tout-o-tour. Ti touzour ena enn ler fre ki ti pe sirkile. Lavi laba ti bien zoli. Tou dimounn ti pe viv an akorite.

Dan gramatin, Granmer leve kouma kok sante. Li pran so bake linz li al bor larivier ansam avek Lucy. Li kontan lav so linz dan larivier akoz gagn delo bien. Letan ki Granmer pe lav so linz, Lucy profite kas bann fler dan zardin akote larivier pou met dan so zoli vaz.

Kan Granmer fini lav so linz dan larivier, li al donn manze bann zanimo. Apre li rant dan kazot pou ramas dizef. Kan li fini, li al kas bann legim ki li pou kwi plitar. Seki anplis, li partaz ek bann vwazin kom dabitud.

Dan vakans, bann kouzin ek kouzinn Lucy, ki res Rose-Hill, vinn pas zot konze kot granmer Melanie. Lucy bien kontan parski li kapav amenn zot vizit so landrwa. Li amenn zot lor montagn pou fer zot dekouver zoli peizaz otour ; anmemtan lor semin montagn zot kas de-trwa goyav-de-sinn. Bann lezot zour zot profite pou al naze dan larivier ek zot ousi kas kann pou zot manze ; zot mem ede pou tir dile avek vas. Dan tanto so bann kouzin riy li parski Lucy al ramas dibwa pou kwi manze. Zot pa ti kone ki kwi manze ousi lor foye dibwa.

Bann kouzin Lucy bien kontan zot sezour kot granmer Melanie. Lavi dan lakanpagn pa parey kouma dan laval. Lanvironman bien kalm ek fer bon pou viv. Lucy ek so granmer bien antoure dan lanatir anba sa lipie montagn-la. Avek ti pansion Granmer, so elvaz zanimo ek ousi so ti plantasion legim, Granmer ek Lucy pa ti mank nanie. Zot lavi dan kwin lanatir ti bien kokas.



Emmanuelle Fidèle
(Philippe Rivalland RCA)



Bann Mervey Lanatir



Enn zour ti ena de garson, Zan ek so kamarad Ryan. Toule de, zot ti gagn per lanatir. Enn zour, zot mama dir zot al kas inpe goyav pou fer konfitir. Zot ti telma kontan zot mama ki zot ti desid pou afront zot laper.

Letan zot rant dan lafore, zot trouv enn bwison pe bouze. Zan ek Ryan inn per. Zot may zot kamarad. Zan pran so kouraz, li al gete ki ti pe kasièt ladan. Li trouv enn tipti zwazo ki'nn tase. Zwazo-la ti pe debat pou li kapav sorti. Toule de kamarad desid pou liber sa ti zwazo-la. Letan zwazo-la gagn so liberte, li extra kontan ek li remersie bann-la.



Ryan dimann zwazo-la kotsa kapav gagn bann meyer goyav. Dan lafore, tipti zwazo-la amenn zot lor enn ti montagn kot ti ena enn ti larivier. Zis akote sa ti larivier-la, ti ena enn pie goyav avek zoli-zoli goyav. Zan ek Ryan pa donn letan ; vit-vit zot koumans kas goyav ziska ki zot sak finn ranpli ar goyav.



Zot pran mem sime ki zot ti vini pou zot retourn kot zot. Letan zot rant lakaz, zot rakont zot mama seki finn ariv zot. Zot mama bien fier ek dir zot « finalman zot sort gagnan. Aster-la, anou prepar nou konfitir. » Depi sa, toulezour Zan ek Ryan al zwe dan lafore.

*Guillano Agathe
(Ste Thérèse RCA)*



Lanatir

Lanatir se enn kado ki Bondie finn donn nou. Bondie inn kre liniver, later, bann kontinan, lamer ek tou et vivan. Nou bizin gard li presiezman kouma enn trezor. Lanatir donn nou manze ek bwar pou nou viv.

Lanatir ousi enn rises pou nou. Li donn nou dibwa, ros ek later pou nou konstrir enn labri. Nou depann boukou lor lanatir pou viv. Akoz samem nou bizin respekte, kontan ek prezerv li. Nou bizin gard li prop ek pa polie li. Nou bizin pa koup zarb, parski zot importan pou dimounn ek bann zanimo. Zot ed nou pou gagn loxizenn.

Olie detrir lanatir, anou anbeli li avek bann fler, plant ek zarb. Kan nou detrir lanatir, nou pe met noumem an danze. Anou protez lanatir ! Anou dir non a polision !



Moira Magon

(Notre Dame du Grand Pouvoir RCA)



Randone dan lafore

Azordi Mardi, mwa ek mo bann kamarad pe fer enn randone dan lafore. Ler rant laba, enn garson ki apel Tizan dir « Ayo, get tou sa bann salte-la. Anou esey ramas salte dan lafore. » Tizan so mis dir « wi, to ena rezon Tizan ! Vremem lafore-la paret bien sal. » Bann zelev avek led zot profeser koumans ramas salte. Zot trouv tou sort kalite plastik, sak gato, ‘take-away’... Bann zelev ti bien etone kan zot inn trouv sa. Enn parmi zot demann ar Mis : « Be Mis, dan lafore kouma kapav ena sa kantite salte-la ? » Mis-la reponn « parey kouma nou, boukou dimounn vinn fer randone, me kan zot fini manze, zot prefer zet zot salte isi zot ale. » « Be Mis, zot pa kone fode pa zet salte partou koumsa ? » enn lot zanfan demande.


Mis-la dir « Zotmem dan lekol, sak fwa dir zot pa zet salte, me zot kontigne... Nou bizin koumans ramas salte noumem avan, pou ki lezot zanfan ousi fer parey. »

« Tousala pa bon. Nou pou fer enn group ansam ek bann paran. Nou pou ramas salte kot nou, dan vilaz ek kot bann larivier », Tizan dir. Tou sa polision ki dimounn pe fer la pe boulvers nou lanvironnman. Apre inpe zour, ler finn arriv ler pou ramas salte dan vilaz, bann dimounn-la trouv enn ta salte anba ek otour bann poubel. Tizan dir « get sa bann poubel-la kouma pe deborde ; get sa bann lisien-la kouma pe fer malang lor sime. Bann lisien pe gagn maladi ek pe mor avek sa bann salte-la. »

Tizan ti telman ankoler ki li'nn koumans koz for ler li pe ramas salte. Li dir « Get sa kantite poubel ena la, me sa ousi dimounn pa konn servi ! Pa pou nanye ena sa bann poubel-la lor sime. » Li ti bien sagrin ki lezot dimounn apart zot pa fer zefor pou protez lanvironnman. Dan lakour lekol osi, sak fwa enn zelev trouv enn salte, li ramas li, li met dan poubel. Tizan ek so bann kamarad kontigne fer zot zefor pou pa zet salte dan lakour lekol. Zot finn trouve ki li importan ki sak dimounn fer so zefor pou protez nou lanvironnman.

Si nou pa pran kont nou lanatir, kisann-la pou fer sa pou nou ?

*Keila Saunders, Amy
Natchoo, Rita Favery,
Luc Frivet,
Krish Karma
(St Patrice RCA)*



Ti Dodo Feno ek bann avantirye



Bien-bien lontan, ti ena enn pei ki ti apel pei Inkoni. Dan sa pei-la, ti ena enn plas mazik. Laba, bote lanatir ti extra. Ou ti kapav admir bann kaskad, bann larivier, bann pie zean ek sirtou bann zanimo ki ti an-vwa-disparision. Ou ti kapav trouv par santenn dodo, dinozor ek mamout reini dan sa landrwa inimazinab la. Lanvironnman laba ti bien prop ; pa ti ena ni enn salte ki ti pe gat dekor lanatir. Lanvironnman laba ti bien akeyan ; tou zanimo ti amikal ek ti viv kouma frer ek ser pou ki lepe regne. Lanvironnman laba ti apezan ek trankilite lanatir ti fer leker respire san okenn laper. Dan pei Inkoni, ti ena enn ti kamarad koni ki ti reste : sete Ti Dodo Feno.

Toulezour, Dodo Feno amenn rol Lerwa baskour. Li fer letour pou dir tou zanimo : « Bonzour... Bonzour, zordi enn gran zour e se koumsa toulezour ! » Apre sa, se enn fenomenn extraordiner ki ou trouve : bann zanimo bor kaskad pe asize, pe naze, pe kas bann fri ek pe koze-riye.

ENN ZOUR, BANN AVANTIRYE FINN DEKOUVER SA PLAS MAZIK LA. ZOT TI TELMAN ZANTI AVEK BANN ZANIMO AN-VWA-EXTINKSION LA KI DODO FENO EK TOU SO LEKIP ZANIMO TI ORGANIZ ENN KONSER POU FER ZOT PLEZIR. SA KONSER-LA TI GRANDIOZ...

Aswar dan lanatir ti ena konser pre kot larivier : ravann ti pe bate, maravann sakouye, pie koumans bouze, bann sante leve, dimounn rant dan lamizman ek tou zanimo vinn gete.

Ti Dodo Feno ek so bann kamarad ti mari apresie vizit bann avantirye. Ler moman depar bann avantirye arive, latristes ranpli leker nou ti dodo. Alors, ansam ek bann lezot zanimo, li desid pou fer landrwa mazik vinn publik.

ENN BO ZOUR, TOU IMIN DEBARKE AVEK ZOT BANN INVASION E KOUMANS VIV DAN PEI INKONI KI TI MAZIK. ASTER KI BANN DIMOUNN FINN VINI, ESKI LANDRWA MAZIK POU RES MAZIK ?



*Julie Lolo, Elysé Chouchon
(St François D'Assise RCA)*

SEKSIION 'SKETCH' LANATIR



Mesaz Later



Prezantater [**antouziast**] : Bonzour ! Bonzour zot tou ek bienveni pou sa nouvo epizod nou emision « Anou Koze », kot nou koz tou koze ki bizin koze ! Zordi nou ena plezir akeyir enn invite ki mo sir zot tou kone. Li ron, li ble, nou apel li planet ble... Se nou mama later, ki ena enn mesaz importan pou nou. [**Aplodisman**]

[Later rant lor lasenn]

Prezantater : Bonzour mama later ! Bondie ooo ! Get sa zoli ble ki pe reyone la. Dir nou kouma ou santi, ou ki tou dimounn dir pli zoli planet dan nou sistem soler.

Later [**dres lagorz**] : Mersi, mem si mo panse sa konpliman-la pena okenn valer... Si ou get pli pre, mo krwar oumem ou per letan ou pou trouv mwa bien. « Belle de loin, mais loin d'être belle ! »

Prezantater [**perplex/ezitan**] : Euhhh okkk ! [**poz**] Me dir mwa enn kou ki sa zoli mesaz ki ou ena pou pase zordi ?

Later : Zoli... Mo pa tro sir si li enn zoli mesaz, me mo finn vinn la pou dir enn bann verite ki kapav deranz zot konsians. [**Nostalzik**] Mo rapel kan mo ti ankor zenes bien fringan. Lepok kot mo ti kouma enn bondie pou bann imin. Lepok kot zot ti pe travay later pou gagn seki zot bizin e ki zot ti remersie mwa pou tousala. Me avek letan, zot inn koumans vinn gourma parski mo pa ti pe demann zot nanye anretour. Zot inn koumans servi zotmem koumadir lakaz mama, bat bis mem...

Zot pran tou seki mo ti kapav donn zot : bann plant, zanimo, petrol ek lezot kiksoz. Zot telman gourma ki zot ousi pran seki tipti e ki pa ankor mir. Zot pe devaliz mwa ek pe tir tou mo zi. Zot pe tir gran-gran lespas ver, ki reprezent lavi, pou konstrir bel-bel batiman gri, ki fad, ek long-long lasemine ek drin. Bann lasemine-la nek krase mem lafime nwar dan sa zoli lesiel ble la. Mo pa koz lafime depi loto... Lafime-la pe touf mwa. Pli ena lafime, pli mo gagn so. Mo bann zoli skilptir glason ape fonn... Lerla, letan ena inondasion ek sounami, zot dir « mer natir danzere ! »

Prezantater [**angwase/panike**] : Fode pa nou nwarsi tablo-la ousi mo panse.

Later : Nwar ankor enn zoli kouler konpare avek bann dese ki pe devide dan larivier ek lamer, e kot mo bann kamarad pwason pe perdi lavi....

Prezanter [**san pozision**] : Bann-la deryer pe fer mwa sign ki ou letan inn fini....

Later [**esoufle/ankoler**] : Abon ? Be, mo fek koumans....


[sekirite vinn sers later]

Prezantater [**riy zonn**] : Ser oditer, nou pe gagn bann problem teknik e nou pe bizin met fin a sa epizod-la... Mersi pou zot lekout.

*Adriel Joly, Annevaenia Arekion.
(Notre Dame de Lourdes RCA)*

SEKSION

POEZI LAMIZIK



Pwisans lamizik



Enn lagitar akorde, pe grat-grate.
Lanbians koumans leve.

Lazwa koumans leve.
Pli li monte, pli nou sante.

Enn ravann tape, lazwa !
Tou dimouunn dans-danse ansam.

Enn violon exprime, dezespwar !
Pli li rakonte, pli sa fer nou plore.



Enn maravann sakouye, lakoler !
Pli li ale, pli li ankoler.


Enn tanbour bate, laper !
Pli li bate, pli nou tou frisone.
Nou tou pli gagn per.
Zot ti pe rakonte, fantom zot laper !

Lagitar re-akorde, lexsitasion !
Nou koumans leve, sante.


Tanbour bate ansam ek lagitar,
Maravann vinn sakouy-sakouye.
Nou tou rekoumans dans sega, sant
sega ansam dan lanbians !

*Shawn Casimir
(De la Salle RCA)*





Lamizik



Depi mo'nn ne ziska zordi
Mo lekor fer lamizik

Li fer nou reve
Li fer nou vwayaze

Mo lalang fer tak tak tak
Mo lamin fer pak pak pak

Lamizik, Lamizik

Mo labous fer la la la
Ala nou danse kas lerin

Lamizik, sega

Lamizik, rege

Lamizik, pop

Lamizik, oriental

Lamizik, folk

Lamizik, sege

Lamizik, afro

Lamizik, klasik


Lamizik fer tou dimouunn rasanble

Ala nou sante tap lamin
Ala nou amize san divin

Viv lamizik!

Lamizik fer nou kontan
Lamizik fer nou relaxe
Lamizik fer nou riyé

Li fer nou plore
Li fer nou panse



Lisa-Marie Labonne

(Saint Julien RCA)



Bote lamizik



Mwa mo enn ravann
Ler sof mwa mo fer son
Ler tap mwa mo vibre
ENN son ki fer laflam leve
Kan mo tann sa son-la rezone tang tang tang ta tatang...
Sa rapel mwa mo kiltir.

Mwa mo enn tryiang
Mo tipti-tipti me fode tande pou kone
ENN son ki fer gagn gidi-gidi dan zorey
ENN son alert, ki fer kas lerin. Ting ti ti ting ting ti ...

Mwa mo enn tanbour
Mo ron kouma enn drom vid
Kan tap mwa leker tranble
ENN son ki fer lekor bouze. Doum doum doum...

Mwa mo enn maravann.
Mo kontan kan sakouy mwa
Mo balans dan tou kote
ENN kout adrwat, de kout agos.
Fode gete kouma mo sakouye. Tik ti tik ti titik ti tik ...
Nou bann instriman ansam nou met lagam pou fer bote lamizik.



Winsley Nelson, Colinne Carpen,
Alexandre Candapa, Alexandre Opera
(Montagne Blanche RCA)



Enn kont-de-fe mizikal



Enn gramatin nou leve nou retrouv nou dan enn kont de fe.

Ti ena boukou fler ek fey laba.

Ti ena ousi boukou pie, fri, lamizik ek plin anz dan lesiel.

Nou ti bann ser ek bann frer.

Nou ti abiy an prinses ek nou rob ti kouler roz ek blan.

Ti ena enn bal kot bann mizisien ti pe zwe lamizik ek ti pe sante.

Bann mizisien-la ti bann zanimo ki ti res dan lafore.

Bann papiyon ti pe akonpagn bann fe pou danse

Ek bann mizisien-la ti pe zwe zoli-zoli lamizik.

Dan ladians nou ti trouv bann sat, lisien, lion, yev, ziraf, elefan, tig ek ipopotam.

Ti ena bann prins degize an mizisien ki ti pe akonpagn bann zanimo.

Nou pa ti anvi retourn lakaz.

Kan bal inn fini, nou'nn al dormi. Letan nou leve, nou retrouv nou sakenn
dan so lasam.

Kan nou al get deor, nou lakaz ousi ti'nn retourn parey.

Elodie Mussard, Emie Arthemidor, Keziah Brigitte,

Angie Christome, Riley Lafolle, Tanushri Mungrah

(St Esprit RCA)

SEKSION ZISTWAR LAMIZIK



Momo ek so ravann mazik

ENN ZOUR DAN ENN PEI, TI ENA ENN GARSON MIZER. LI TI ENA NEF AN EK LI TI APÉL MOMO. LI TI RES DAN ENN TI LAKAZ PRE AR ENN TI VILAZ, ANBA LIPIE ENN MONTAGN. LI TI ABITIE AL KAS FRI DAN BWA POU VANTE DAN VILAZ POU ED SO FAMI.

SA ZOUR-LA, LER LI MONT LOR PIE, LI TROUV ENN ZAFER DE LWIN PE BRIYE. LI DEGAZE DESANN EK GALOUPE AL DAN DIREKSION LALIMIER-LA ZISKA KI LI ARIV KOTENN ROS. LOR SA ROS-LA TI ENA ENN RAVANN BIEN SAL KOUVER EK LABOU. MOMO PRAN RAVANN-LA EK GALOUPE RETOURN LAKAZ. LER LI RANTRE, LI PRAN ENN SIFON MOUYE LI SOUY RAVANN-LA. LI AL KASIEZ DAN SO LASAM EK LI SEY TAPE. MOMO PA TI KONN ZWE RAVANN EK LI TI PE TAP BRIT-BRIT.

APRE KI LI FINN TAP TRWA KOU, ENN TI FE APARET. FE-LA DIR : « FER ENN SWE EK MO POU REALIZ LI... ME AVAN, TO BIZIN FER ENN ZAFER POU MWA ! ENA ENN MOVE SORSIER KI FINN ATRAP LARENNE BANN FE EK MO BANN LEZOT KAMARAD. LI FINN ANFERM ZOT DAN ENN LAGROT LOR MONTAGN. » MOMO DEMANDE KIFER LI FINN FER SA, EK TI-FE REPONN : « PARSKI SORSIER-LA ANVI KOKIN TOU POUWVAR BANN FE. ESKI TO POU ED MWA ? » MOMO AKSEpte.



Ti-Fe kontigne : « Pran ravann-la nou ale ; nou pou bizin li pou liber bann fe. » Momo dir : « Be kouma sa ravann-la pou ed nou ? » Ti-Fe reponn : « Ravann-la mazik, ek gras a li, nou pou kapav konbat Sorsier, parski kan enn dimounn zwe li, sorsier-la afebli ek perdi so bann pouwvar. » Lerla, Ti-Fe ek Momo pran direksion dan bwa ek marse ziska dan bout montagn. Laba, ti ena boukou brouyar ki ti anpes zot trouv lagrot sorsier.

ENN KOU, TI-FE DIR : « ESKI TO TANN SA SANTE-LA ? »

Momo reponn : « Non, mo pa pe tann nanye ».

« Ayo... Mo'nn blyie dir twa ! Bann dimounn pa tande kan bann fe sante. Akoz mo enn fe mo tande. Vini swiv mwa. »

E zot kontign avanse dan direksion sante-la. Kan zot pe marse, enn ta sovsouri pa kone kot sorti pas lor zot figir ale. Ler zot get devan zot, zot trouv lantre lagrot. Zot rantre, me Momo koumans kriye : « Fer nwar ladan ! Mo pa trouv nanye ! » Ti-Fe dir : « Atann to pou trouve la ! » Kouma li fini dir sa, so de ti lezel koumans briye ek ekler lagrot.



Dan lagrot, lao zot latet ti ena sovsouri, lezar ek boukou lakaz zaregne. Apre detrwa pa, zot trouv bann fe ki ti anferme dan bann ti bokal. Dan fon lagrot, Sorsier ti pe fer enn posion dan so marmit. Li met so kouyer dan marmit ek ler li vire pou donn bann fe bwar, li trouv Momo ek Ti-Fe. Sorsier nek lev so lame lao, voltiz ravann ek Momo ek Ti-Fe toule de anvole al tap dan kwin bann lakaz zaregne. Momo releve ek Ti-Fe degaze dir li tap ravann. Momo ramas ravann ek koumans tape. Anmentan, Sorsier perdi so bann pouvwar, tom dan marmit ek disparet. Deswit, bann bokal kot bann fe ti ete vinn lapousier ek tou bann prizonie libere.

Tou bann fe ek zot larenn vinn antour Momo ek remersie li. Ti-Fe dir li : « Aster to kapav fer to swe. » Momo dir : « Mo zis swete ki mo fami sorti dan lamizer. » Larenn-Fe koste ek azoute : « To enn bon garson ; gard sa ravann mazik-la ek mo pou realiz enn pli gran zafer pou twa. Mo swete ki to vinn enn gran zwer ravann. » Momo remersie bann fe pou zot kado ek retourn kot li. Ler li arive, li pa krwar so lizie... Dan landrwa kot so ti lakaz ti ete, enn gran lakaz finn pran plas. Andan, tou so fami ti dan lazwa ek Momo degaze li al rakont zot so lavantir. Depi sa zour-la, Momo ti nepli mizer ek vremem apre de-trwa banane, li finn vinn enn gran zwer ravann.

*Gwendoline Ecumoir, Illona Sara, Christiano Nadal,
Fabien Nadal, Jaydon Nobin
(Ste Cécile RCA)*

Vwayaz ansante enn mazisien pou konkerir lamizik



ENN ZOUR DAN ENN PEI ANSANTE, TI ENA ENN TI VILAZ KOT TI ENA PLIN ZOLI LAMIZIK. TOU BANN ABITAN TI ZWAYE E ZOT TI PE PAS ZOT LETAN SANTE EK DANSE. ME ENN ZOUR, PANDAN KI BANN VILAZWA TI PE FER FET, ENN GRO MISIE KI RESANBLE ENN ZEAN E KI PA TI KONTAN LAMIZIK DITOU, FINN DEBARK DAN VILAZ E FINN ANPES BANN DIMOURENNE ZWE BANN INSTRIMAN. MISIE-LA TI TELMAN ANKOLER KI LI FINN KAS TOU BANN INSTRIMAN LAMIZIK, DEPI SO LAGITAR, SO RAVANN, SO TRIYANG, SO MARAVANN, SO DJEMBE, NANCY PA FINN SAPE... TOU BANN ABITAN TI DAN ENN GRAN TRISTES. LOT KOTE, MISIE-LA TI PE EXTRA RIYE. ENN KOUT, ENN ABITAN DEBOUT EK PROPOZ ENN LIDE :

Anou al get misie mazisien. Mo sir li pou kapav ed nou.

ZOT TOU DAKOR E ZOT PRAN DIREKSION LAKAZ MAZISIEN. ARIV LABA, ZOT EXPLIK ZOT PROBLEM MISIE MAZISIEN, KI PA EZITE POU ED ZOT. LI KOUMANS REFLESI E GAGN LIDE POU FABRIK ENN POSION MAZIK POU DONN SA ZEAN-LA POU TRANSFORM SO LEKER. MAZISIEN RASIR BANN VILAZWA KI TOU POU RANT DAN LORD BIENTO, ME LI POU BIZIN FER ENN VWAYAZ DAN LAFORE MAZIK POU AL ROD SO INGREDIAN SEKRE POU FABRIK SO POSION.

MISIE MAZISIEN KOUMANS SO VWAYAZ. APRE ENN-DE PA DAN LAFORE MAZIK, LI ZWENN ENN SFINX, KI ARET LI.


BONZOUR ! KOT OU PE ALE KOUMSA ?

MO PE BIZIN AL ROD ENN LAPOUSIER MAZIK DAN FON LAFORE.


Haha ! OU KRWAR KOUMSAMEM OU POU PASE ? OU BIZIN REPONN MO DEVINET AVAN. PARE ?

MAZISIEN SAKOUEY LATET POU DIR WI.

MO PREMIE TROUV DAN 'LAMER', MO DEZIEM TROUV DAN 'GIDI-GIDI', MO DERNIE SE LEKONTRER 'BONER'. KI MO ETE ? SFINX FER ENN TI SOURIR PARSKI LI PANSE KI ZAME MAZISIEN



pou konn repos. Mazisien fer so latet travay, ek ep ! Li fer enn gro sourir ek reponn « se enn lagitar ». Sfinx ti telman ankoler ki li fer enn grognman bizarre apre li'nn ale. Vit-vit mazisien galoupe komans rod enn lagitar. Rezman li reysi trouv lagitar-la, ki ti dan enn sak akrose ek enn pie ki ti pe zwe lamizik. Li grinpe, li al rod sak-la ek koumans grat-grat so lagitar. Enn sel kout, kouma dir mazik, enn melodi nek sorti depi lagitar ek bann not koumans flote pou indik li direksion ki li bizin pran pou travers lafore. Li swiv bann not ki kondir li direk ek enn likorn. Likorn-la dir :



Bonjour mo bon misie. Heeiinn... Ki bon nouvel pe amenn ou par isi ?

Bonjour zoli likorn. Mo pe bizin rod lapousier miltikolor pou fer enn posion mazik, me mo pa pe kone kot mo pou gagn sa.

Mont lor mo ledo. Mo amenn twa fer enn ti vwayaz lor larkansiel.

Wi ! Sa enn bon lide. Mersi likorn.

Apre enn de gallo, likorn anvoie direksion larkansiel. Mazisien pa krwar so lizie kan li trouv lezel likorn ouver koumadir lezel enn anz. Zot ti pe briye koumadir enn tonn zetwal finn zwenn ansam pou form so lezel. Lao, so lizie ouver an gran. Li pe admir sa zoli peizaz ki premie fwa li pe dekouver. Depi lesiel, tou ti paret tipti. Bann dimounn ek zanimo ti kouma bann ti kreatir, alor ki bann lakaz ek bann pie ti resamble enn zouzou menaz zean. Inpe pli lwin, likorn pas atraver bann group niaz kot li trouv bann anz pe danse ek sante : lapli-laponp, siter-siter panari, alaronn ti-mike, zakana-zakana... Kot gete zot ti pe zwe. Mazisien ti telman emerveye par sa spektak-la ki li pa'nn realize ki zot finn fini ariv lor larkansiel. Mazisien desann depi lor ledo likorn ek remersie li pou sa vwayaz mazik la. Li tir enn ti sak depi so pos, ramas so lapousier miltikolor ek les so lekor glise koumadir lor enn gran laglisad.

Kan li rant kot li, mazisien fer enn gato kot li azout so ingredian sekre. Vit-vit, li ariv devan lakaz zean, e ala problem... Kouma li pou reysi donn li sa gato-la pou li manze ? Letan li lev latet, li trouv enn parmi bann esklav zean ki ti pe sarye enn gato ki zean ti sipoze manze pou so tifin. Li gagn enn lide pou transform limem an esklav, me li pa ti ena okenn formil mazik ni okenn baget mazik pou li kapav fer sa. Par sans, enn fe ti pe pas par la, e kan li finn trouv sa pov mazisien-la so figir trakase, li finn propoz li so led. « Zigidi-zigidou-zoum ! » avek enn kout baget mazik, mazisien finn sanz laparans. Li donn zean so gato, e zean ti telman gourman ki li aval gato-la enn sel bouse. Depi sa zour-la, zean so leker finn transforme e li finn vinn bon ar tou dimounn. Li'nn mem koumans danse ek sante ansam ar bann vilazwa !

*Kimberley Labonne, Joelly Appou, Alicia Etrange, Darwin Godin
(Signal Mountain RCA)*

Rev Maeva finn realize



Enn zour dan enn pei ti ena enn tifi ki ti apel Maeva. Li ti ena nef an. Li ti touletan anvi zwe lagitar, parski toulezour ler li pas kot laboutik Misie Laval, li trouv Tonton Sam zwe lagitar.

Tonton Sam, se enn vie misie ki res dan landrwa. Li bien konn zwe lagitar. Toulezour li avek so lagitar anba laboutik Misie Laval ; li sante ek zwe so lagitar. Bokou dimounn bien apresie li.

Enn zour kan li pe al lekol, Maeva arete pou ekout Tonton Sam zwe lamizik. Li finn telman interese ar lamizik-la ki kouma li rant lekol li rakont so bann kamarad seki li finn ekoute gramatin. Pandan tout lazourne li finn res koz samem.

Tanto kan li rant so lakaz, li demann so mama ek so papa si zot kapav aste enn lagitar pou li. Me so mama ek so papa ti pov ; zot pa ti kapav fer Maeva plezir. Maeva ti tris. Li pa ti pou kapav aprann zwe lagitar.

Landemin, kan li pe al lekol, li al koz ek Tonton Sam. Li dir Tonton Sam ki li ti anvi aprann zwe lagitar me ki so bann paran pov e zot pa kapav aste enn lagitar pou li. Alor, Tonton Sam dir li pa bizin trakase, li pou montre li kouma zwe lagitar.

Tanto kan li sorti lekol, li rant so lakaz e li dir so bann paran ki li finn demann Tonton Sam montre li zwe lagitar. Depi sa, toulezour apre lekol, Maeva al kot Tonton Sam pou li aprann zwe sa linstriman-la.

Enn zour, kan li al kot Tonton Sam, li dekouver ki Tonton Sam finn mor, parski li ti bien vie... Maeva finn bien plore. Anmemtan, li trouv enn ti mo ki Tonton Sam finn ekrir lor enn ti papie pou demann Maeva pran swin so lagitar.

Alor, pou rann omaz Tonton Sam, Maeva desid pou partisip dan enn konkour lamizik. Li servi lagitar Tonton Sam ek li zwe lamizik ki li finn aprann avek li. Tou dimounn inn kontan so lamizik. So lafami ek kamarad ti pe get li lor televizion. Bann ziri ousi finn bien kontan so lamizik ek li finn gagn premie pri. Li finn gagn enn biye pou al Lafrans pou kontinie zwe lamizik.

So bann paran, fami ek kamarad ti bien fier pou tann Maeva so lamizik zwe lor radio, lor televizion ek mem lor « You tube ». Apre tousala, li finn vinn bien seleb, e sa gras a Tonton Sam, ki zame li pa pou blye. Nou sir ki Tonton Sam ousi bien fier Maeva la kot li ete.



Lavi Lontan



Enn zour dan enn zoli pei Moris, ti ena enn zoli vilaz ki ti trouv dan les e ki ti apel Montagne-Blanche. Bann abitan laba ti pe res dan bann kan sikriye Sans-Souci. Bann dimounn ti bien ere ek landrwa-la ti bien zoli. Bann vilazwa ti bien pros avek lanatir ek zot ti bien respekte zot lanvironnman. Zot ti plant legim ; ti ena bann zoli zardin fler, boukou kalite pie, karo kann ; ek lanatir ti bien ver. Zot ti pe swagn bann zanimo, kouma lapin, poul, lezwa ek kanar. Zanfan ti kontan zwe boul, kanet, lamarel, sapsiway, ek fil servolan dan enn gran laplenn ver pre kot larivier. Malgre lavi ti difisil, bann abitan ti bien zwaye. Zot ti pe respekte nou mama later.



Dan vilaz ti ena enn zoli tifi ki ti apel Natacha. Natacha ti ena kat bon kamarad ki ti al lekol ansam ar li. Bann zanfan-la ti bien kontan zwe lamizik ek dans sega. Zot ti fabrik bann linstriman tradisionel avek kap-sil, ranz ravann ek lapo kabri, tanbour, lagitar ek marakas avek bann lagrin pou fer lamizik. Dan tanto, bann zanfan ti pe zwenn pou zwe, sante, danse, amize. Zot ti fer bann spektak ek pran bann bwat lamok pou tape ek fer lamizik. Zot ti pe sant « ti ena enn ti Marmit, enn ti poul nwar ti dans ladan », tap bann linstriman lamizik kouma batri, lagitar, laflit ek tap boutey. Zot dir zot pe fer fet Divali, Fet Printan, Abolision Esklavaz ek Fet Pak. Zot ti pe badinn-badine ek zwe koumadir zot bann gran artis.

Natacha ti ena enn profesor ki ti apel Misie Paul. Li ti montre zot kouma zwe lamizik, sante ek dans sega, ek ousi ranz bann linstriman tradisionel. Zot ti devlop enn gran pasion ek lamour pou sante ek zwe lamizik. Zot ti inspire pou vinn bann gran artis par zot profesor, akoz zot ti pe sant bien ek zwe lamizik bien. Natacha ek so kat kamarad finn pran par dan enn konkour lamizik. Zot ti gagn premie pri pou al Rodrig pou al aprann lamizik Rodrige ek dans sega tradisionel dan Rodrig. Lamizik finn ed zot vinn pli zwaye, konfian ek gagn pli bon rezulta dan lekol... Bann zanfan-la ti selekte pou al fer zot reprezentasion dan bann lekol lezot pei, kouma Larenion, Rodrig ek Sesel. Zot paran ek zot profesor ti bien fier ek kontan. Bann zanfan ti pe partaz zot kiltir ek zot rises avek lezot pei.

Azordi, Natacha ek so kat kamarad finn grandi. Zot finn vinn bann gran artis ek zot fer bann spektak internasional. Zot bien kontan ek zwaye. Rev Natacha avek so bann kamarad finn realize. Zot finn vinn bann gran santer ek mizisien. Zot kontinie sante, danse ek fer bann repetision pou gard zot lamitie. Aster zot pe mem montre bann lezot zanfan kouma bizin sante, danse, ek zwe bann linstriman lamizik. Lamizik finn donn zot zot dipin. Tou bann dimounn finn konn zot ek zot landrwa finn vinn popiler gras a lamizik. Kan bann dimounn pe fer fet, zot dir Natacha ek so bann kamarad vinn sante ek zwe lamizik pou zot. Lamizik finn amenn lazwa, boner ek korperasion dan zot leker. Lamizik finn donn bann abitan lespwar. Lamizik inn amenn enn reyon soley dan zot lavi. Natacha bien fier ki li enn santez ek enn mizisienn. Natacha ek so bann kamarad konfian ki dan lamizik ena lavenir. Sak lane, le 21 Zien, zot selebre enn gran fet Lamizik pou zot zoli pei Moris. Lamizik enn zoli mervey ki fer tristes disparet. Natacha dir kan nou zwe lamizik, nou res an bonn sante avek enn lespri pozitif ek touletan dan lazwa.

SEKSIION SKETCH LAMIZIK



Lamizik kas tou baryer

Introdiksion : Lamizik zwe : piano, tanbour, etc. Enn group zanfan pe pas par la ; zot tann sa bann son-la, e zot dir :

1^e zanfan : Ey ! Ekout sa ! Enn zoli son sa.

2^e zanfan : Tar... Vremem do !

3^e zanfan : Bann zanfan dan konservatwar ki pe zwe sa.

4^e zanfan : Zot ena lasans !

3^e zanfan : Mwa osi mo extra kontan lamizik.

2^e zanfan : Lamizik tou pou mwa.

[Bann zanfan fer enn slam]

Lamizik pa zis manifik

Li ousi mazik

Avek lamizik lespri fer koustik

Lekor bouze kouma lastik

Sante-danse, sote-pile, bouze, zigile, vibre !

Kan tann lamizik pa kapav arete.

Mem si parfwa to agase

Avek so zoli son to pou ere

Lamizik tir twa dan dife

Li amenn twa dan lagete

Konversasion kontigne ant bann zanfan

1^e zanfan : Domaz nou pa kapav zwe lamizik nou.


5^e zanfan : Kisann-la dir zot ki nou pa kapav zwe lamizik nou ?

1^e zanfan : Kouma to'le nou zwe lamizik ? Bizin linstriman pou fer sa.

2^e zanfan : Kas mem nou pena pou manze... Li pe koz linstriman li !

3^e zanfan : Gaspiyaz, gaspiyaz ! Nou ale ! Pa pou nou sa !

5^e zanfan : E, atann ! Pa dekoraze. Mo ena enn solision...



[Bann zanfan fer ankor enn slam lor lamizik]

Lamizik pena baryer

Li pa get kouler

Avek so zoli ler

Li tir twa dan to maler

Mem si to pena larzan

Lamizik pa fer exizan pou amenn twa de-lavan

Lamizik tir twa dan to karapas

Pou amenn twa dan lespas

Mem si to pena kas

Avek lamizik to emerveye
To santi twa zwaye
To vwayaze san deplase

[Bann zanfan kontign koze]

4^e zanfan : Me kouma pou fer sa ?

5^e zanfan : Li sinp. Avek seki ena otour nou, nou kapav fabrik bann linstriman. Vini mo montre zot.

[Tou bann zanfan swiv li ek li ed zot pou ramas bann obze ki zot kapav servi pou fabrik linstriman lamizik. Avek bann obze ki ena lor lasenn, bann zanfan-la fer sanblan ki zot pe aranz zot linstriman. Enn par enn, bann zanfan-la vinn devan lasenn avek linstriman ki zot finn fabrike pou prodir enn son individiel. Zot sant enn sante pandan ki zot pe zwe linstriman ki zot finn fabrike.]

Lamizik pena baryer
Li pa get kouler
Avek so zoli ler
Li tir twa dan to maler

Mem si pena larzan
Lamizik pa fer exizan
Pou amenn twa de-lavan
Pou amenn twa de-lavan

[Repran refrin]

Lamizik tir twa dan to karapas
Pou amenn twa dan lespas
Mem si to pena kas

[Repran refrin]

Avek lamizik to emerveye
To santi twa zwaye
To vwayaze san deplase

[Repran refrin]



*Chloé Cangy, Elodie Larosée, Rodney Lapunaire, Loïc Farla, Amy Gobin
(Notre Dame de la Paix RCA)*



Zistwar Ti-Frère

Sheridan finn invit so kamarad Jaron pou vinn pas de-trwa zour kot li Quartier Militaire. Jaron res Souillac ek li pa konn ditou sa landrwa kot Sheridan reste la.

Sheridan : Bonzour Jaron, to finn bien dormi ? Pare vit-vit mo pou amenn twa vizit mo landrwa zordi.

Jaron : Anou ale.

Sheridan : Ey ! Sort ek debarder ? Fer fre isi ! Met enn jacket lor twa !

Jaron : Non ta ! Korek la. Toule zour mo abiy koumsamem mwa. Apre ousi, mo pa finn amenn jacket mwa. Ale... Anou al enn fwa !

Sheridan : To kone ? Isi nou dan oter ek ousi nou ena bokou zarb. Akoz sa fer fre preske touletan. Me to kone, sa bann zarb-la zot prodir bokou loxizenn, ki gard nou tou an bonn sante.

Jaron : Ey, zot bann zardin bien prop. Sheridan, sa stati vie bolom la, ki ete sa ?

Sheridan : Sa nou lerwa sa ! To pa konn Ti-Frère ?

Jaron : To ti frer ? Li vie koumsa ?

Sheridan : Pa mo ti frer... Sa dimounn-la ti apel Ti-Frère. Anfin, tou dimoun apel li Ti-Frère, me li apel Alphonse Ravaton. Nou apel li lerwa sega.

Jaron : Lerwa ? Enn vie bolom ek enn sapo fet lor so latet ?

Sheridan : Asize mo rakont twa. Ti-Frère finn ne le 22 avril 1900 dan Quartier Militaire, ki trouv dan distrik Moka. Li'nn mor an 1992. So papa ti enn gran santer malgas. Li ti pe sante dan bann bal labou, toule Samdi swar. Se koumsa ki Ti-Frère finn kontan sante. Bien zenn, li finn koumans sant bann sega tipik.

Jaron : Be lekol ?

Sheridan : Non, Ti-Frère zame finn al lekol. Li pa ti konn lir ditou, me li ti kapav invant ninport ki lamizik pou twa dan enn timama.

Jaron : Ki li ti pe invante koumsa ? Bann lamizik Ramanisum, Black M ?

Sheridan : Non ta ! Ti-Frère ti bat sega zis ar enn triyang li. E zoli son mo pe dir twa ! Li ti zwe ousi ravann ek maravann. Get sa, nou ale, mo amenn twa zwenn enn so ti-zanfan. Ti-Frère ti konpoz enn ta sante ki dimounn ziska Larenion, Rodrig ek Sesel tou ti pe ekoute. Me sa lepok-la, sega ti enn zafer vilger ek zis dimounn pov ki ti pe ekout sa.

Sheridan : Allan ! Allan !!! Aaaaaaallan !

Allan : Vini vini, nou pe met enn ti son la.

Sheridan : Mo kamarad Jaron sorti lesid. Ek li pa konn Ti-Frère. Larg enn ti son pou li.

Allan : Mo enn aryer ti-zanfan Ti-Frère. Dan Quartier Militaire, tou dimoun kontan Ti-Frère. Mem si zot ti dir li lerwa sega, Ti-Frère ti bien mizer. Li finn fer enn ta ti travay pou ki li kapav gagn kas pou viv.

Allan : Apre, plitar kan sega finn koumans gagn bann novo linstriman, zot tou finn blyie Ti-Frère. Me isi dan Quartier Militaire, dan tou nou bann bal ek bann ti program, nou kontigne zwe bann sega Ti-Frère.

Jaron : La ki fet pou ena la ?

Allan : La pe fer repetision pou laniverser matant Olga. Asiz zot.

Allan : « *Lagrin kafe dan mo moulin
Ek sa, moulin pa roule
Tir li met par laba
Koumsa mo moulin va roule... »*



*Jaron Sirop, Sheridan Ramdally, Allan Back, Jensley Jolicoeur
(St Léon RCA)*



**DE-TRWA LEZOT
TANTATIV
EXPRESION KREATIF
AN KREOL MORISIEN**

Zanfan lanatir

Dan enn ti vilaz pre ar enn lafore, souvan ti ena bann brakonie ki ti kontan touy bann lelefant. Enn zour, pandan ki zot pe fer enn letour dan lafore, bann zanfan landrwa remark enn group brakonie ki pe sey ras defans enn lelefant... Zot pran de-trwa ros, zot mont lor pie ek zot koumans avoy lor bann brakonie-la. Deswit, bann-la sove ale !



Kan zot inn sir ki nepli ena okenn danze, bann zanfan-la desann lor pie ek zot desid pou swagn lelefant-la. Zot atas de-trwa fey banann lor so dimal ek zot ousi donn li manze pou li gagn lafors. Answit, zot return dan zot vilaz ek zot rakont zot mama ek zot papa tou seki finn arrive dan lafore...

De-trwa zour apre, enn lot zafer arrive... Volkani ti pre ar vilaz ena pou rant an eripcion ! Ankor enn fwa, bann zanfan-la deside ki zot bizin rann zotmem itil. Zot al inform tou bann vilazwa, enn par enn, ki pe arrive. Tou dimounn rant dan bann bato ek zot sove, me malerezman, ena ki finn mor.

Bann ki'nn reysi sove finalman trouv enn lot ti zil kot zot kapav reste. Ler zot arriv laba, zot fer enn gran fet pou rann omaz tou bann dimounn ki'nn perdi lavi.

Solena Seetamun (Plaine St Cloud RCA)

Dora ek so liv mazik

Ti ena enn tifi ki ti apel Dora. Li ti ena enn liv lamizik lor lanatir. Dora ti bien kontan partaz so bann zistwar avek so bann kamarad.

Ala enn zistwar ki ti ena dan liv Dora : Enn zour dan enn pei, ti ena enn ti garson ki ti apel Tiko. Tiko ti bien kontan lapes. Enn zour, Tiko kap lekol ek desid pou al lapes dan so ti pirog zonn. Letan li pe lapes, li santi so lalign pe redi ; ler li gete li trouv enn gro pwason. Pwason-la ris li dan dilo. Tiko panike ek li gagn per kan li trouv sa gro pwason-la. Li naz touzour ek plor touzour... Tiko pa finn realize ki sa gro pwason-la ti enn rekin.

Li sey repran so lesouf ek naz pli vit ki li kapav. Laper dan li, Tiko koumans kriye, me pli li kriye pli li trouv nazwar rekin-la pe koste pli pre ek li... Tiko koumans realize ki li pa pou sap la vivan.

Malgre sa, li kontign naze naze naze ek al pli dan fon. Ler li get deryer li, li trouv rekin-la pe elwagne. Enn bann peser ki ti pe pas par-la trouv li ek ramenn li lor laplaz.

Sa zour-la, Tiko ti gagn vremem extra per. Li demann limem ki ti kapav arrive si rekin-la ti reysi trap li...



Robinn ek ti Martin

Enn zour dan enn pei ti ena enn zwazo ; li ti tipti, li ti kouler gri, li ti bien kontan manz papay mir ek li ti apel Robinn. So mama ti apel Pamela ek so papa ti apel Laval. Robinn ek so fami ti res lor enn pie mang dan zot nik dan Mont Carmel Road, Chemin Grenier.

Mo finn blyie dir zot ki sete papa Laval ki ti aranz sa ti nik-la avek bann lapay kann ki li ti gagne depi dan karo lot kote Basin Pizon, ki pa lwin ek Mont Carmel Road. Zot ti fami ti kontan zot lakaz. Zot ti bien ere.

Pandan lete, ti fer telma so ki Robinn ek so fami ti desid pou al laplaz St Felix pandan lasemenn. Laplaz ti zoli, avek so disab fin. Delo ti tied, lamer ti kouler ble. Apre ti ena bann ti pwason ki ti vinn naz dan bor-dan bor ek ti ena kokiyaz lor laplaz.

Laba, Robinn ti kontan al lor sa ta pie koko ki ti ena la, ek lor bann pie filao ki ti bien ot. Li ti ousi kontan asize, sot-sot lor laplaz, ek ekout bann son bann vag.

Telma zot ti kontan sa laplaz-la, mama Robinn ek so papa ti ranz enn lot nik pou zot pas zot bann lazourne laba. Zot ti fer li kouma enn kanpman pou zot rilax ek gagn lape. Enn zour kot ti fer extra extra so, boukou zanimo ti vinn lor laplaz. Ti ena lisien, sat, papiyon,conde, tourtrel ek mem enn zozo maniok. Pa ti ena plas pou asize ek marse. Ti ena boukou tapaz. Enn bann ti pe zwe ek lagrin filao, ek lezot ti pe galoup-galoupe. Enn kout, ti ena enn gran tapaz. Robinn, depi lao dan so nik lor pie filao, ti tann lisien dir :

« Mo laplaz isi »

Sat ti reponn :

« Mo'nn vinn isi pou mo repoze ek mo pa pou ale, parsiki laplaz pou tou dimounn. »



Personn pa ti'le sede ek diskision-la ti kontigne. Depi sa, Robinn finn koumans deteste laplaz St Felix. Lape ki ti ena laba ti'nn ale. Sa laplaz-la ti'nn gate. Lerla, enn ti kamarad ki ti apel Nadinn finn montre Robinn enn lot laplaz : laplaz Pomponette !

Pomponette ti pli trankil, pli top ; ti ena plis pwason ki ti pe zwe ek naze dan bor dilo. Malgre ki li ti pli danzere, kan so bann vag ti kraze lor brizan, sa ti fer extra zoli.

Enn zour, ler Robinn pe retourne lakaz ; ler li pe anvole lao dan filao ; li trouv enn ti martin ki'nn tonbe lor enn gro ros, inpe kabos-kabose, koumadir li pe dormi. Ala Robinn koste, tous li. Ti martin leve, me li pa kapav anvole. So lezel inn kase. Avek led so mama ek so papa, Robinn finn ramas li ek finn amenn li lakaz kot zot pou zot swagn li. Zot servi latres kolant ek de bout dibwa pou tini so lezel anplas. Toulezour, zot donn li manze ek delo.

De semenn apre, so lezel inn fini geri. Martin tir latres kolant ek dibwa. Li desann depi nik ; li sakouy so lezel de-trwa kout ek li dir :

« Pa kone si mo pou kapav anvole. »

Robin reponn :

« Martin, to pou kapav. Seye ankor ! »

Martin seye ankor de-trwa kout ziska ki li reysi anvole pou rant so lakaz. Plitar, li retourn get fami Robinn pou remersie zot pou zot led.

Robinn dir li :

« Nou touzour bizin led nou kamarad. »

*Maeva Gaud, Cassidy Benoit, Nayah Prosper, Cherina Chiffonne,
Christaelle Mariva (Notre Dame du Mont Carmel RCA)*

Lamizik

Nou tou kontan lamizik.

Pena personn ki pa kontan lamizik.

Sak dimounn kontan so kalite lamizik.

Si pa ti ena lamizik, kouma nou ti pou ete : kontan, tris, malere, ere, per ?

Nou ti pou soke !

Lamizik...

Kan nou pe kondir, nou bizin ekout lamizik ;

Ek kan nou pe fer devwar nou bizin ekout lamizik.

Lamizik nou sel rezon.

Nou tou nou kontan ekout lamizik.

Ena dimounn ki kontan ekout sante Bondie,

Ena ki kontan sante poetik,

Me mwa mo kontan sante zwaye ek mo pa kontan sante tris.

Me kanmem, mo bien kontan lamizik.

San lamizik, mo pa kone kouma mo lavi ti pou ete.

Kan mo tann lamizik mo gagn anvi danse.

Lamizik nou sel lavwa, nou sel ekosistem.

Si nou pena rol, enn sel zafer nou panse : sante.

Kan enn dimounn pena rol, li kapav ekout lamizik.

Kan enn dimounn anvi ekout lamizik, li pa ezite.

Li pran so portab ou so bafoul li ekout lamizik.

*Marie Salome Roxanne Chowree
(Notre Dame du Grand Pouvoir RCA)*





Zistwar Piter Pan

Enn zour dan enn pei mazik, ti ena enn lakaz kot tou bann dimouunn kont-de-fe ti reste. Ti ena enn gran-gran fet. Pou sa fet-la, ti ena boukou dezord, me apre ki bann-la inn fini, zot inn met lord e lerla bann prins ek prinses inn al kot zot.

Lanwit swivan, ler tou dimouunn inn al dormi, Piter Pan – ki ti res akote ar lakaz-la – ti rantre ek li kriye: « Kokoriko ».

Zot leve zot al gete.

« Hin ! Sa mo sir Piter Pan sa ! »

« Win ! Mo pa kontan so bann blag... »

« Mo ena enn sel swe : ki li
disparet... »

Ler bann-la ti pe koze, anmemtan Kapitenn Krose ti pe espionn zot avek Misie Mous. Bann-la al kriye Piter Pan.

Piter Pan al kot zot pou gete kifer bann prins ek prinses inn apel li.

« Pena personn. Ah... Enn gro gato lor latab ! Si mo manz li, personn pa pou kone. »

Bann-la kriye : « Sirpriz ! » Lamizik zwe ek anmemtan bann-la danse ek abiy Piter Pan kouma enn fam !

« Me ki finn arive ? Kifer mo pa pe kapav bouze ? » Piter Pan demann limem.

« Li bon, sa va aprann twa. »

Depi sa, Piter Pan aret fer blag.



*Jahly Besegue, Kaline Laridain,
Adriano Labonne,
Ivan Luchoomanen, Yanno Hyppolite
(St Jacques RCA)*



Zistwar an dio


ENN TIFI TI APÉL BOUCLE D'OR. LI TI ENA ENN KAMARAD KI TI APÉL LUKA. LI TI BIEN KONTAN SO LISIEN KI TI APÉL REX. LI TI ERE. ENN ZOUR, BOUCLE D'OR TI DIMANN SO MAMA SI LI KAPAV AL LAMER. SO MAMA REFLESI.

« Wi !!! » Mama Boucle D'or reponn li.

« Mo extra kontan », Boucle D'or dir.

Boucle D'or al get Luka pou zot al lamer. Ler zot arriv lamer, zot koumans naze. Apre, zot al rod kokiayaz ek zot pas enn bon lazourne. Aswar, ler zot pe retourne, Luka dimann Boucle D'or si li kapav res kot li, ek Boucle D'or aksepte.

Letan inn arriv ler pou dormi, zot tann enn zafer fer : « KRAK !!! » Zot tann ankor enn fwa « KRAK !!! » Zot al get deor ek zot trouv enn misie pe koup bann pie. Boucle D'or dir li aret koup sa bann pie-la. Li explik misie-la ki ena lakaz so bann kamarad, bann ekirey, lor sa pie-la. Misie-la dakor avek li ek li aret koup bann pie-la.



Noémie Lecordier, Melvin Luddoo, Wayne Stephanore, Bhavish Beeharry
(St Jacques RCA)

Posfas

M

o dir enn gran bravo a sa lekip profeser ki'nn ankadre bann zelev KM Grad 4 pou sa proze-la, e sirtou mo felisit tou bann partisipan dan sa aktivite literer la. Mo sir ki kan zot pe trouve ki zot text inn pibliye, zot pe resanti enn gran fierte pou seki zot finn resi fer avek led zot profeser! Zot finn demonstre ki zot ena kapasite; ki zot ena talan. Ekrir se kominike. Kominike se exprim seki nou trouve, seki nou resanti, seki nou ete dan pli profon nou lam... Mersi ki zot finn aksepte partaz inpe seki zot ete atraver zot kreativite, e ki zot inn reysi montre nou bote lamizik, kreasion imin, ek bote lanatir, kreasion Bondie.

Dr Gilberte Chung Kim Chung (Direktris Exekitiv SeDEC)



ISBN 978-99949-0-387-0